

HEBREOS

Yi Necy Huidi Pinjaty Yajniguejx Je Hebreo jäy

¹ Jecy'ajty Dios ayuc yejcy ma ajt nmij'ap nmijteedy canaag'oc etz canaagnax miid je yprofetas ajcxy, je' ajcxy huidibi najtzcapxiy Dios y'ayuc. ² E jadachambi ma xii tiempo yhuingooni co je naaxhuiñybi ycixani, Dios ayuc yecy ma ñich ajt miid je' y'ung. Dios miid y'ung yaj'oyiyy je naaxhuiñybi etz tüg'óciy tijaty huidibi yajpatp. E Dios ti y'ung yajmigo'ixmadziydäy tüg'óciy. ³ Dios y'ung ymiid Dios y'oy'ájtín, yi' je' Dios ytücxin'ajtpy yjajin'ajtpy. Yi' je' codinaayb etz yajniguëxgy nej je' je Dios. Dios y'ung huijtz'ijtaayb tüg'óciy miid je' y'ayuc etz ane'min mic'ajt miidpi. Co Dios y'ung ti xyajhuaatzim ajt nbocy, chi cöbijcy je mij'ane'min jiiby tzajpjoty, jadu'n nej jihuüy y'ixtacy a'oy'amy ma je mijpi Dios ymijc jiiby tzajpjoty.

Dios y'ung jacmij yi'ca'ydi ángeles ajcxy

⁴ Je Dios y'ung jac mij je' ymic'ajt y'ane'min miidity, ca'ydi je ángeles ajcxy. Com yi' je' Dios y'ung, paady ycixpi mic'ajt miidity jaydëbi ane'my huidibi Dios yje'ajtpy, e ca'ydi yi ángeles ajcxy yi jadu'mbi mic'ajt miid.

⁵ Com Dios ca' yi' ni tüg ángel nimay:

ñich miich n'ung'ajtpy. ñich miich ti nyajpi'c'aty jadachambi xii.

Nañ jadu'n ca' Dios ni tüg ángel nimay:

Miich xyteedy'adiibich, ñich miich n'ung'adiiyb.

⁶ Co Dios y'ungoob oy quexy ma naaxhuiñyjäy chinäy, chi yi' ane'min pidacy:

Huen je ángeles ajcxy nidüg'óciy huindzigihuipy pa'tjihuihuipy je' y'ung.

⁷ E miid je ángeles ycixpi, Dios ymina'ñ:

Yi ángeles jadu'n yi' ajcxy nej poj. Yi' ajcxy huídibi tzajpjoty tzinaayb, jadu'n yi'ajcxy nej huídzc, nej jĩnye'n.

⁸Jadu'n Dios ymĩnañ miid y'ung ycixpi:

Miich, Dios'ajtp, miich m'ane'mĩn huinixĩ huinĩtiempo yi' y'idĩpy. Miid mdudägy'ajtin miich m'ane'mĩpy.

⁹Ti mdzocy je tiy'ajt tiybi, e ca' ti m'ixa'ñ je jibĩcpi. Paady ycixpi Dios, miich mDios, ti xyhuin'ixy, e ti yejctäy nigĩ ma miich je jotcuyc'ajtin je xondaacin, ca'ydĩ ma yi mmi'ane'mbidijc.

¹⁰Dios nañ jadu'n ymĩna'ñ:

Miich, Huindzĩn Dios, oga'n'aty mbidac nej naaxhuiñybi chondacy, e miid miich mmiic'ajt myaj'oyĩy je tzajp.

¹¹Cijxtähuiy yi naaxhuiñybi etz yi tzajp, per miich hui'mĩp huinixĩ huinĩtiempo. Jadu'n yi naaxhuiñybi etz yi tzajp y'amijydähuiy nej huit.

¹²Jadu'n miich yi naaxhuiñybi etz yi tzajp m'anėgĩpy nej tũg huit yaj'anėgyĩn. Jadu'n miich yi naaxhuiñybi etz yi tzajp myajtigadzĩpy nej jäy ajcxy yajtigach yhuit. Chi miich je'ni m'idĩpy, je mxĩ mjmĩjt ni mina ycacixĩpy ycatigoyĩpy.

¹³Ni camĩna Dios canĩmay ni tũg je ángeles ajcxy:

hĩa' ma iich nmĩjc a'oy'amy, ixtĩ mabaad iich miich je mmĩdzĩp nmĩmadactäyĩch, jadu'n yi'ajcxy ni-paadĩpy nej yi' miich mdecypocxpejt'adyii.

¹⁴Tũg'óciy je ángeles ajcxy ac espĩritu yi' ajcxy, e ytungĩxy ma Dios, yquexyöyĩxy jigĩx pubedĩpy je jäy ajcxy huídibi ajcxy y'alma padam ñĩdzoocĩn.

¹ Míid jadayaabi tiy'ajt ycixpi, oy co yajxon n'ocjäyguüiyim Dios ytiy'ajt huidibi ti nmidoohuim, jigix ca' njijpyöyduutim je Dios ytiy'ajt huidibi jadu'n nipatp nej tü'aa oybi. ² Pen je ayuc tiy'ajt huidibi ángeles ajcxy yejc jecy'ajty, hui'm je' co yjanchity. E pinjaty pocytumb, e ca' cuyduuni Dios ytiy'ajt, Dios chaachytunipy je' nej padyii míid ypocy ycixpi. ³ ¿Nej tijy ñch ajt co Dios ycastigo nga'ocpaatim, pen je' je' yam ca' nmijpidaacim je Dios ytiy'ajt jadu'n nej jëbi xyajnídzoocim ajt n'alma? Yi Huindzin Jesús jayijp'aty ci'm nigapxy Dios ytiy'ajt jadu'n nej jëbi Dios xyajnídzoocim ajt n'alma. E jac'axam je discípulos ajcxy nañ jadu'n najtzcaxi Jesús y'ayuc, e nigapxpejty ajcxy co yjanchity je Jesús y'ayuc, e chi capxnajxy ajcxy jada tiy'ajt ma ñch ajt. ⁴ Jadu'n anajty capxhuäxcixy Jesús y'ayuc ma ñch ajt, chi Dios jajniguëxäcp Jesús y'ayuc co yjanchity co tuñ ijxpejt, mijhuinma'ñ etz milagro. E co Dios xymooyim je yjihu'ñ ymic'ajt, chi nije' nije' nbaatim mic'ajt ma Dios. E jadu'n Dios tuñ nej yi' tzocy.

Jesucristo jadu'n je' anajty nej ajcxy yjuugy ymígüg

⁵ Dios ca' yi ángeles ajcxy ti cötujcin möy co y'ane'mity ya naaxhuiñ, jadu'n nej xii tiempo min cidägy, je xii je tiempo huidibi ñch ajt nnimiyaacim. ⁶ Hue' janchtiy ji tüg'it yjaybetyity ma Dios ñecy, ma ymina'ñ:

Miich Dios, ¿ti yi' je naaxhuiñjyä, co miich yi' ajcxy mjäymedziyb? ¿Ti yi' je naaxhuiñjyä, co miich je' ajcxy mjotmay'adyii?

⁷ Janch con xii tiempo miich ti mmöy yi' naaxhuiñjyä ajcxy e nañ ti mmöy jacminacy ymic'ajt y'ane'm'ajt ca'ydi yi' ángeles ajcxy. Per jac'axam miich mmöhua'ñ naaxhuiñjyä ajcxy nigü ymic'ajt y'ane'm'ajt, ca'ydi je ángeles ajcxy.

Tüg'óciy huidijaty miich ti myaj'oyïy anajty ti mbidactähuip yi' ma yi naaxhuiñyäjy ajcxy ane'min.

⁸ E co anajty ti mbidactäy anajty ma yi' ajcxy y'ane'min, jadu'n nipaady nej jihuïy tüg'óciy tijaty huidibi ti myaj'oyïy, y'idipy ma yi' ajcxy ytecypa't.

E jadu'n yi', co Dios moyday ane'min je Cristo. Dios ni ti yi' ca'ixmach nicxy yca'ity ma yi' y'ane'min. Oy ixypy ca'ni cham n'ijxim co tüg'óciy tijaty ya naaxhuiñ etz tzajpjoty ca'ni amugi' ycapxycöbigyii. ⁹ Dios ti xyaj'ijxim co Jesús miid mij'ajt ane'm'ajt. Je ángeles ajcxy niigi mic'ajt oy'ajt anajty miidity, ca'ydi Jesús co yi' chinay ya naaxhuiñ. Jadu'n Dios tuñ jaydebi Jesús y'ogy miid jäy ajcxy ypocy ycixpi. Jadachambi Dios ti möy Jesús mij oy'ajtin, etz mij ooy ti cömay miid je tzaachy'o'cin huidibi ypaat.

¹⁰ Tüg'óciy huidijaty ya yajpatp, ji'ajtp yi' miid Dios ycixpi etz Dios ymic'ajt yaj'ijtaayb tüg'óciy huidibi ji'ajtp. Dios tudägy ytuuñ co yajca'pxi Jesucristo y'oy'ajtin miid je tzaachypi huidibi ti minaxy ti yajnaxy. Miid co Jesucristo tzaachypi ti minaxy ti yajnaxy, paady ycixp jäy ajcxy padaangixy Cristo y'oy'ajtin. ¹¹ Miid co Jesucristo, je huidibi jäy ajcxy yajpocyñihuaatzp, jiiby mic'ajt ti paady ma Dios Teedy, paady ycixp yi' ajcxy huidibi patcixp pocyñihuaatzin nañ jim mic'ajt patcixy ma Dios Teedy. E miid co Jesucristo etz yi' yjäy mic'ajt patcixy ma Dios Teedy, paady ycixp Dios y'ung je Jesucristo ca' ti tzo'ydu'n jihuïy co yi' ymina'ñ co je mibijcpidijc jadu'n nipaady nej yi' yjugytijc ymigügtijc. ¹² Paady je Cristo ymina'ñ ma yjaybetyity:

Miich Dios, iich miich ngapxpadipyich ma nmigügtijcich.
N'ihuiipyich iy miid miich ycixpi ma je jäy ajcxy ti nayoymújigixy.

¹³ Nañ jadu'n Cristo ymina'ñ ma yjaybetyity:

Nmijpidägıbyich Dios.

E jadüg'oc ymınaanip:

Cha ıch, mıid je ung anäg ajcxy tıibi Dios xymöyich.

¹⁴ Ma jäy ajcxy ytügquëx'ajtcıxy, tügpi yxiıxy, tügpi ni'py je' ajcxy. Nañ jadu'n Jesús ymıid je' anajty yxiıxy ñi'py jadu'n nej jäy ajcxy ymıidity jigix jëbi y'ögy, e jadu'n je' yajhuındıgoydähıpy je huıdibi anajty jamic'ajtmıid co jäy yaj'ögııyb, je' je' je mujcu'. ¹⁵ E jadu'n je Cristo yajnihuädzıctuty tüg'öcıy pinjaty anajty cojuyıy codoogıy y'ıjtp ma je mujcu', mıid co tzigııygıxy yi y'o'cin. ¹⁶ Janch co Jesús ymııñ ya naaxhuiñ, ca' nımaanım co pubeda'ñ je ángeles ajcxy, je' janchtıy ypubedamyb Abraham y'ap y'oc. ¹⁷ E mıid jada ycıxpı, Jesucristo jadu'n anajty mıidity ñinıcx etz yjugy'ajtin tú'cıy mıid je jugytıjc ymıgügtıjc ninıcx etz jugy'ajtin, jigix jëbi yi' naydügpajc codınäy naaxhuiñyjäy ajcxy ma Dios yhuınduu mıid tudägy'ajt etz pa'ayoohuın. Etz nañ jadu'n jigix jëbi huındzigıy Dios mıid yci'm ñinıcx mıid jäy ajcxy ypocy ycıxpı, e jadu'n yajpocyhuaatztähıp yi mayjäy ajcxy. ¹⁸ Com Jesucristo ci'm tzaachypi minajx yajnajx, etz nañ jadu'n je mujcu' Jesucristo jot'ıjxy huınma'ñ'ıjxy, paady ycıxp Jesucristo jëbi pubety pinjaty jadu'n tzaachypi minajxp yajnajxp, etz ma yjot'ıxyii yhuınma'ñ'ıxyii je mujcu'.

3

Jesús jacnıgi mıjıty yi' ca'ydi Moisés

¹ Mıid co Jesucristo jadu'n ti tuñ, paady ycıxp mi-ich ajcxy mıgügtıjc huıdibi cıxyjot huınıjot mıjpidacp Jesucristo, je huıdibi ajcxy Dios ti xyhuın'ıjxcıxy co xyje'adánıgıxy. Pıdaaccıx mhuınma'ñ yajxon ma je Cristo Jesús, je huıdibi nejhııyım co Dios ti quexy ya naaxhuiñ, je huıdibi tügpajc mıjtungmıid ma Dios, huıdibi tügpajc xycodınaayım ma Dios. ² Jesús tudägy yi' ti y'ity

ma Dios yhuinduu, je Dios huidibi ti yajnibigyii je mjtung, tim jadu'n nej Moisés y'ijty tudägy ma je ytung miid tüg'óciy jäy huidibi anajty ti cöbijccixy Dios ycötujcin ma Moisés. ³ Jesús ymihuaad nigü huindzigi'ñ etz cömayin, ca'ydi Moisés. Tim jadu'n nej pin tüg tijccojpü je' je' ijtp cömay, ca' nminaanim je tijc ijtp cömay. ⁴ Tüg tüg tijc jim je' pin cojp. Per Dios yi' ti yajcojtäy yaj'oyiydäy tüg'óciy huidibi ji'ajtp. ⁵ E jadu'n je Moisés tudägy je' ytuuñ miid tüg'óciy jäy huidibi ti paady Dios ycötujcin ma yi'. Je Moisés je' ytung'ajti yejcy je tiy'ajt huidibi anajty Dios jac'axam yegamyb. ⁶ Je Cristo tudägy ytuñ miid tüg'óciy iich ajt huidibi mijpidacp Dios, tim jadu'n nej tüg jäy y'ung tudägy ytuñ ma yteedy ytijc yteedy ypidägy. Jadu'n iich ajt nbaady nej Dios ytijc, e Cristo tudägy ytuñ miid iich ajt, pen tudägy nmibijcim Dios y'ayuc, ca' n'ixmajtzim ajt nmibijcin. Pen nmijpidaacim Dios agujc jotcujc ixti mabaad n'o'cim miid je' ycixpi huidibi nijjp'ijxim ma Dios.

Dios yjäy ajcxy ypooçxin

⁷ Paady ycixp jadu'n yjaybetyity ma Dios ñecy ma je Espiritu Santo jadu'n yminañ:

Jadachambi pen midooyb miich ajcxy nej Dios ymina'ñ,

⁸ ca' ajcxy m'ijtcixy jotjuuñ jadu'n nej je' anajty ajcxy jotjuuñ y'ity, je' ajcxy huidibi mibidigy Dios jecy'ajt (co ajcxy y'ijty jim mjtigüduum). Je xii je tiempo jecy'ajty co ajcxy jot'ijxy huinma'ñ'ijxy Dios.

⁹ Chi Dios ymina'ñ:

Miich ajcxy mmij'ap mmijteedy ajcxy jim mjtigüduum xyjot'ijx xyhuinma'ñy'ijxich ajcxy jecy'ajty. Ca' ajcxy jäy mech co ajcxy y'ijxy anajty canaag mijhuinma'ñ huidibi ndumybich anajty miid yi' ajcxy ycixpi huixchiguipx jimijt.

¹⁰ Paady njotma'tyich miid miich ajcxy mmij'ap mmijteedy jecy'ajty, e nminaañich: “Niidigoy tüdigoy ajcxy jabom jabom ma yjot yhuinma'ñ. E ca' ajcxy nejhuñhuaangixy anajty ñch nni'aa ndü'aa.”

¹¹ Paady yi' ajcxy nmijotma'tyich, e janch janch nnimaayich ajcxy, e ca' n'ñindägyich, co ca' ajcxy ytigñhuipy ma ñch nbocxtac.

¹² Migügtijc, naygüend'ájtigix nidüg nidüg co ni tüg miich ajcxy mgamiid'adip jibicjot jibic-huinma'ñ, e ni mga'ixmájtzcixipy Dios juugypi y'ayuc, miid co ca' mmibijccixy. ¹³ Hue' janchtiy nayjot'amijmóoyigixy miñ xyipy jabom jabom nami xii tiempo yjacnicxñi. Jadu'n miich ajcxy mdunipy, ca'ydi ajcxy yi' pocytunñ xyhuin'ingixy, e chi anajty mnaybidáacigixy jotjuuñ. ¹⁴ Pen nmibijcím nmijpidaacím Cristo y'ayuc tiibi nbaatim oga'n'aty, e ca' n'ixtigñhua'cím mabaad n'o'cím, chi jébi n'ijtim miid Cristo.

¹⁵ Je' je' je huidibi jaybetyity ma Dios y'ayuc:

Cham, pen mmidooyb miich ajcxy nej Dios ymina'ñ, ca' ajcxy m'ijtcixy jotjuuñ, jadu'n nej je' anajty ajcxy huidibi Dios mijotma'tp anajty miid co ajcxy mibidígy Dios.

¹⁶ ¿Pinjaty ajcxy huidibi jecy'ajty midou Dios y'ayuc e mibidígy Dios? Nidüg'óciy je' ajcxy huidibi tzomb Egipto naaxjot jecy'ajty miid Moisés. ¹⁷ ¿Pinjaty je Dios ymijotma't jadu'n huixchiguïpx jimijt? Je huidijaty ajcxy tundigoy miid Dios ytiy'ajt, e je' ajcxy cijx y'octaaygixy jim mijtigíduum. ¹⁸ ¿Pinjaty Dios ñimay co ni camina ytigñhuipy ma je Dios y'it ylugar ma jébi ypoocxcixy miid yi'? Je' ajcxy huidibi ca' ycapxymidoy. ¹⁹ Paady

nnejhuñyim co janch ca' ajcxy jajty nej ytiñygyixyipy ma Dios y'it ylugar miid co ajcxy ca' mibijcy Dios y'ayuc.

4

¹ Com nmiidni ajt Dios y'ayuc, jadu'n nej ti xyaj'ahuanñyim co ndigñyim ma yi' chinaydac yjygy'ajttac, e nboocxim miid yi'. Paady ooy tzocy co ndzigñyim Dios. Ca' jecyity co nidüg miich ajcxy ca' mdigñhuipy miid co ca' mmibijccixy Dios y'ayuc. ² Nañ jadu'n ti ñich ajt nmidoohuim je Dios y'ayuc oybi, tim jadu'n nej yi' ajcxy jecy'ajty ti midooy. Per ca' Dios y'ayuc ma ti ypubedyii ajcxy co ti jamidoogixy je tiy'ajt. Com hue' ajcxy ymidou, e ca' ajcxy mijpidacy. ³ ñich ajt com ti nmibijcim je Dios y'ayuc oybi, ñich ajt je' tiñyimip ma je it huidibi Dios ti tijy ma jëbi nboocxim miid yi'. Com Dios jadu'n yminañ:

Paady yi' ajcxy nmijotma'tyich, e nnimäyich ajcxy, n'ñibaadyich ngapxpaadyich n'ayuc, co ni camina xii yi' ajcxy y pocxtac capaadyipy ma ñich.

Tüg'óciy huidibi Dios yajcojy yaj'oyñy, hue' ti yajcojy ti yaj'oyñy jayijpni ca'ni anajty naaxhuiñybi chondacy.

⁴ Com ma yjaybetyity je tiy'ajt jiiby muumity nigapxy je mihuixtujcxñibi ma jadu'n yminañ:

Dios ypooocy je mihuixtujcxñibi miid je' ytung ycixpi tiibi anajty tuñ.

⁵ E jadüg it yjaybetyity ma Dios ñecy ma jadu'n yminañ:

Ca'p yi' ajcxy ytiñygyixyipy ma ñich nbocxtac.

⁶ Hue' janchtiy Dios yjacmiid'ajtyñi it lugar ma y pocxtac ma jëbi pinjaty ytiñhuip. Yi' ajcxy huidibi tzinay jecy'ajty huidibi jayijp midou Dios y'ayuc, ca' je' ajcxy ytiñy ma Dios y pocxtac, miid co ajcxy capxycömidoodacy Dios.

⁷ Paady ycixpi Dios ti pidägy tüg xii tüg tiempo mina jëbi pinjaty tiñhuipy ma yi' y pocxtac. Je' jadachambi

xii tiempo Dios ti pidägy. Dios ti xyñimaayim nej David yminañ tzach com jecy, nej miiñ jaybety huidibi ti yajni-gapxy co jadu'n ymina'ñ:

Jadachambi pen midooyb miich ajcxy nej Dios ymina'ñ, ca' ajcxy mnyabidáacigixy jotjuuñ.

⁸ Co Josué je Israel jäy ajcxy camoy je pooocxin, ca' Dios canigapxy huingbi xii mina ytigihua'ñ ajcxy ma Dios ypocxtac. ⁹ Paady ycixp, jadu'n yjac-hui'myñi jadüg xii tiempo mina Dios yjäy ytigihua'ñ ma Dios ypocxtac.

¹⁰ Com pinjaty tigiyb ma Dios ypocxtac hue' je' ypocxy miid je' ytung ycixpi tiibi anajty tuñ, tim jadu'n nej Dios ypocxy je mihuixtucxiibi miid je' ytung ycixpi tiibi anajty tuñ. ¹¹ Hue' tzocy co naymic'ijxim nej huaad ndigiiyim ma je Dios ypocxtac, ca' yjeyity co nijjity miich ajcxy mbaduunipy nej ajcxy y'idüich huidibi ajcxy ca' mibijcy Dios y'ayuc, e ca' mdigiiygixipy ma Dios ypocxtac.

¹² Com yi Dios y'ayuc ijtp yi' huinixii huinitiempo, e ymiid mic'ajt. Nigi yajtigiyñajxtäy ninicx, jot almi, ca'ydi tüg espada huidibi mejtz'adu'm'amy jijpip etz yjijpxu'ñity. E Dios y'ayuc nejhuiydaayb nej jäy ajcxy yjot yhuinma'ñ miidity, e tüg'óciy tijaty ajcxy ñijot'ajtcixyp.

¹³ Ca' ji ni ti huidibi Dios ti yajcojy nicxy ñayyüchyii ma yi' yhuinduu. Tüg'óciy nej ajt njot nhuinma'ñ nmiidity ñiguëxictähuip yi' ma Dios, je Dios ma iich ajt nguendi ngiyegaanim, yi' ijxtaayb ajt njot nhuinma'ñ.

Jesús yi' je' je mijhuingapxpi ma Dios

¹⁴ Jesús, je Dios y'ung, yi' je' tügpajc jacmijtungmiid huidibi xycodinaayim ma Dios miid ajt nbocy ycixpi. E Jesús ti ytigiy ma Dios yhuinduu, paady ycixp tzoc ijtüm tudägy ma ajt nmibijcin. ¹⁵ Pues com Jesucristo, je huidibi tügpajc mijtungmiidip ma Dios, je huidibi xycodinaayim etz xyhuingapxim ma Dios, com Cristo

tzaachypi etz ijxta'ni canaagnax ti yajnaxy, tim jadu'n nej ich ajt tzaachypi etz ijxta'ni nyajnajxim, per je' ca' ma ti bocy tuuñ. Paady ycixpi jëbi Cristo ajt xypa'ayoohuim co ajt nyajnajxim tzaachypi etz ijxta'ni. ¹⁶ Tzoc agujc jotcujc nmihuingoonim je Dios y'ane'mdac e n'ojadajtim nmibijctzoohuim Dios, jaydëbi co anajty jotmay mmiid'ajtim, chi Dios may'ajt oy'ajt tunipy mmiid ich ajt ycixpi.

5

¹ Tüg tüg mijtungmiiidpi huudibi huingapxp jäy ajcxy ma Dios, hue' je' yajhuin'ijxp ma yëydijctijc, etz yajñigapxpejty, jaydëbi yhuingapx jäy ajcxy ma Dios etz yajnaxipy Dioscojuyip mmiid jäy ajcxy ma Dios, etz yegipy huindzigi'ñ ma Dios mmiid jäy ajcxy ypocy ycixpi. ² Je mijtungmiiidpi jäy ajcxy yajñibijc huudibi huingapxp jäy ajcxy ma Dios, jëbi yi' ajcxy pa'ayooy huenpinity huudibi pocy ymiid, com nañ jadu'n yi' ajcxy pocy jihuiy. ³ E mmiid yci'mbocy ycixpi copicy yegipy huindzigi'ñ ma Dios etz mmiid jacjadyii jäy ajcxy ypocy ycixpi.

⁴ Ni pin huaad ci'm ycanaymoyii je jadu'mbi tung co yhuingapxity ma Dios. Dios yhuin'ijxpy pinjaty huingapxip ma yi' mmiid jäy ajcxy ycixpi, tim jadu'n nej Dios huin'ijxy Aaron jecy'ajty etz yajñibijcy yi' jadu'mbi tung. ⁵ Jadu'n yjajty mmiid je Cristo, ca' ci'm nayñibijctzoohuuyi ma yi' jadu'mbi tung. Dios yajñibijci co huingapxip mmiid jäy ajcxy ycixpi, e ti ymoyii je mij'ajt jadu'n nej anajty ti nimäy:

Miich je' ich n'ung. ich miich mjogy'ajt ti mmöy cham.

⁶ Nañ jadu'n ymina'ñ jadüg'it ma Dios ñecy:

Miich je' mhuingapxyp je jäy ajcxy ma Dios huinixii huinitiendo, tim jadu'n nej Melquisedec ytuuñ.

⁷ Co Cristo chinay ya naaxhuiñ, chi ooy mijuydágy minucxtágy Dios, chi ooy mibijctzoy janch mic je Dios huidibi jébi ycohua'ñyii ma je o'cin. Miid co ooy mibijcy ooy huindzigiyy Dios miid yung naxy yjot yhuinma'ñ, paady Dios ymidoohui. ⁸ Je Cristo oy je' anajty Dios ja'ung'adyii, yjajti nej ycapxymidoohuipy Dios, miid je' ycxipi nej anajty ti y'ayoy ya naaxhuiñ. ⁹ Co Cristo yajca'pxy yi' y'oy'ajtin miid je tzaachypi huidibi yminajxy yajnaxxy, chi ni'ixi' anajty y'ity jébi cop'adyii alma níd-zoocin huinixi, jaydébi tüg'óciy pinjaty capxymidoob Cristo, ypaadip ajcxy y'alma nídzoocin. ¹⁰ Dios jadu'n yajnbijcy Jesús co yajnicxip je jac mijpi tung ma yi' co huingapxip jäy ajcxy ma Dios, tim jadu'n nej Melquisedec ytuñ jecy'ajty.

Je ayon co njijpyöyduutim yi mibijcin

¹¹ Ooy iich miich ajcxy mij nmiiidmiydäga'ñ ma jadaabi tiy'ajt, per ooy chachchip nimiyaacnity, com ca' miich ajcxy mic'amy mhuiñijihuñhuipy Dios ytiy'ajt. ¹² Jadu'n nej jada xii tiempo ti yjejni ma miich ajcxy oga'n ti mmibicy. Hue' miich ixypy ajcxy mniyaj'ixpijnip Jesucristo ytiy'ajt je tzijatypi. Per miich ajcxy mdzojcyñi co myajnajtzcaxihuipy huinjemy je Dios y'ayuc huidibi ca' chipity. Ti miich ajcxy m'ahuimbijttaaygixy ca' mic majaa ma mmibijcin. Hue' jeyi miich ajcxy jadu'n nipaady nej pi'ctijc huidibi leche uucp, e ca' jadu'n paady nej mij'anactijc huidibi caagy caayb. ¹³ Pinjaty yajpatp ma jada ixpijcin huidibi ca' chipity, jadu'n yi' nej ma'xungdijc com ca' jajtcixy je ayuc tiy'ajt tiybi. ¹⁴ Je' tzijatpyi tiy'ajt je je' winjihuiygixp, je' huidibi ymibijkin mij may mid'ajtkixpin, jidu'n nej je' huidibi y'aa ytütz jim ajkixyin je' títzpi jich kaagy je' ykaaygixpy, je' ko yjajtkixpy je' nej winjiwiiygixichin je' huidibi oy, etz je' huidibi ka'oyin.

6

¹ Paady tzoc niġi yajyujcpejtim n'ixpijcin ma Dios ytiy'ajt, tzoc ajt yajyeecim nmibijcin, jġigix jadu'n ni-paadip jadu'n nej jāy tiibi yhuinma'ñ yca'pxtaayñi. Ca' n'agapxiyo'cim canaag'oc jabom jabom je tiy'ajt huidibi ti nbaatim co oga'n nmibijcim Cristo. Ca' janam jat-zojc n'ixpijco'cim huidibi oga'n ti n'ixpijcin jadu'n nej co njothuimbijtim nej anajty ndunim jibicpi huidibi xyajnicxim ma yi o'cin, e jadu'n nej nmibijcim Dios oga'n.

² Ca' jadüg'oc n'ixpijco'cim je ixpijcin miid je niibejtin ycipi, etz jadu'n nej yajcñixajy je mibijcpidijc jaydebi paadip ajcxy je Dios yjihui'ñ ymic'ajt, etz jadu'n nej yi öcpi ajcxy yjugypigipy co anajty ti öccixy, etz jadu'n nej Dios tzaachytuna'ñ huinixi pocyjäydijc.

³ Chi njac'ixpijcin Dios y'ayuc je tzipjatypi, pen Dios jadu'n tzojcpy.

⁴ Com pinjaty ti huinjihuïy Dios y'ayuc ytiy'ajt, e jāygidägy huidibi Dios yejcpy, etz miidty Dios yjihui'ñ ma y'ay yjot, jadu'n je' nipaady nejjihuïy chinay ma jün ytiicxin.

⁵ Etz ti ajcxy jāygidägy Dios y'ayuc ytiy'ajt, e ti jihuiygixy Dios yjihui'ñ ymic'ajt huidibi yajtzinaayip ajcxy y'alma ma je xii je tiempo huidibi miimb cidacp.

⁶ Yi jadu'mbi jāy, pen tundigooyb ajcxy jadüg'oc miid Dios ytiy'ajt, e ixmach ajcxy nej anajty ti mibijccixy Jesucristo, ca'p jēbi jadüg'oc jothuimbijtcixy ma Dios miid pocy ycipi e pijctzoogixy pocyhuinmeecxin jadüg'oc. Co ixypy jadu'n ajcxy tuñ, chi huimbizimy nej ajcxy jadüg'oc yajcruudzpejtcixy je Dios y'ung miid ajcxy ypocy ycipi, e nixiiccixy yajxiiccixy nej Jesucristo y'o'cy miid ajcxy ypocy ycipi.

⁷ Jadu'n yi' ajcxy nej naax ni'uuctich naag'oc naag'oc ytu'y. E pen je naax yejcpy ooy cosecha ma pin ti niipy ti ytuñ, Dios je' anajty yconuucxin ymiid.

⁸ Pen actim apy etz actim jibic ujtz ypidzimy ma je naax, ca' je' ti tzoohuity, e Dios je' yajtigoyamb etz nöctähuip

ma je mij jün. (Jada naax jadu'n jada' nipaady jadu'n nej jäy huidibi ti ixmach ymibijcin.)

Yi huidibi nmibijcin yi' xhuijtz'ijtim tudägy

⁹ Migügtijc ajcxy huidibi ooy ndzocyich, oy ñich ajcxy jadu'n njamiidmiydägyich miich ajcxy, janch nehuiybich co ca' ajcxy ti m'ixmach yi mibijcin, etz nehuiybich co oybi conuucxin mbaadaangixyp ma Dios etz m'alma ajcxy nidzoocin paadaangixy. ¹⁰ Com Dios ooy yi' ytudägyity, e ca' yi' jäydgoy huidibi miich ajcxy mdumyb miid yi' ycixpi, jadu'n nej oyjäy'ajtin ti mdungixy miid jacjadyii mibijcpidijc, e chambaad jadu'n mdungixy. ¹¹ Hue' ñich ajcxy ndzocyich co miich ajcxy nidüg nidüg mnixondaaccix tungix oyjäy'ajtin ixti mabaad m'öccixy, jigix mbaadipy ajcxy tüg'óciy huidibi ajcxy mjijp'ijxyp ma Dios. ¹² Ca' ñich ajcxy ndzojccixy co miich ajcxy m'ahuimbidity nuux. Padungix miich ajcxy jadu'n nej ajcxy ytungixy huidibi mibijcp Jesucristo etz huidibi yajtungixp mecxtujcin, jaydëbi mbaatcixy tiibi Dios xyaj'ahuaniiygixy.

¹³ Co jecy'ajty Dios moy Abraham je' y'ayuc, ci'm je' nigapxpejty y'ayuc, com ca'anajty ji jac mijpi pin nigapxpedipy je' y'ayuc. ¹⁴ Chi Dios Abraham nimay: "Janch co ñich miich ngonucxip, e nmöhuipy may m'ap'ung m'apmang." ¹⁵ E jadu'n Abraham y'ahuijxy miid mecxtujcin, e jadu'n ycidigiiyi huidibi anajty Dios ti yaj'ahuaniiyi. ¹⁶ Co ajcxy jäy ycapxcixy co yjanchity, jim je' pin ñigapxpejtp je' y'ayuc, je' pin jacmijp, je' nigapxpejtpy jada ayuc. E co nigapxpety je' y'ayuc, chi je' ayuc y'ity, e ca' huaad pinjaty ymina'ñ co ca' yjanchity. ¹⁷ Paady ycixpi Dios nigapxpejty yci'm'ayuc, miid co anajty yajnejhuñhua'ñ je' jäy ajcxy co cuyduna'ñ y'ayuc tiibi ahuaniiy. ¹⁸ Ji yajpaady mejtznax Dios y'ayuc huidibi

ca' huaad capxtigach, e Dios ca' y'aniidägy nimina. E co Dios jadu'n tuñ, chi xyajjotcugiiyim mij, iich ajt huidibi n'ixtaayim e ndzojcm yi' ypubejtin. E ti nmijpidaacim yi' y'ayuc jadu'n nej jijp'ijxim co xymöhuaanim ajt n'alma jugy'ajtin huidibi ca' ycixipy ytigoyipy ni mina. ¹⁹ E miid co njijp'ijxim co Dios xymöhuaanim ajt n'alma jugy'ajtin huidibi ca' ycixipy ytigoyipy, paady ajt n'alma jotcuic ijtim ca' ma tzigi'ñ jihui'ñ. Jadu'n Dios y'ayuc nipaady miid iich ajt ycixpi nej tüg pujx huidibi je barco huon'ijtp mejyoty, ca'ydi nej yjaty je barco. Iich ajt njijp'ijxim co ndigihuaanim ma Dios y'it tzajpjoty, tim jadu'n nej je judío sacerdote mjtungmiidpi ytigiy anajty jecy'ajty ma Dios y'it ma je Dios ytijc, je it huidibi anajty adiyducyip miid huit. ²⁰ Tigihuaanim iich ajt ma je Dios y'it tzajpjoty ma Jesús ytigiy miid iich ajt ycixpi, Jesús ti yaj'ahuäch nej jébi ndigiiyim ma Dios y'it. E jadu'n Jesús naydügpajc huingapxy etz codinäy mayjäy ma Dios yhuinduu huinixii huinitempo. Jesús ytung tim jadu'n nipaady nej Melquisedec ytuñ jecy'ajty.

7

Yi Jesús tim jadu'n ymijity nej Melquisedec

¹ Je Melquisedec hue' je' anajty rey'ajtp ma je cajp huidi yxii Salem, e je' anajty huingapxp ma je mijpi janchypi Dios tzajpjotypi. Co anajty Abraham yhuimbity co anajty oy ti chiptuñ, ma anajty je reydiyc oy ti yajqueec-huäcxtäy ti mimadactäy, chi Melquisedec choon oy jijpcoyöyiy Abraham, e chi ooy Dios mijuydacy minucxtacy miid Abraham ycixpi. ² Huidibi anajty Abraham ti paady ma anajty oy ti chiptuñ, chi je' pijc-huäcxy majcpicy, chi pugoñ tüg-picy mooy je Melquisedec. Melquisedec yxii hue' yhuimbizimy “rey tudägypi”. E com co

anajty yrey'aty jim Salem, hue' Salem yhuimbidzimy “jotcujc'ajtin”, paady jëbi nminaanim jadu'n, “je rey huidibi jotcujc'ajtin yejcp”. ³ Je Melquisedec ca'p anajty yajnejhuïy ytaj yteedy, ni y'ap yteedy. Ni ycayajnimiydägy nej ypi'c'ajty etz nej y'ögy. Tim jadu'n je' anajty yajpaady nej je Dios y'ung, tüg huidibi huingapxp jäy ajcxy ma Dios huinixii huinitiempo.

⁴ Occuenditungixy miich ajcxy nej je Melquisedec anajty ooy ymijity. Je Abraham, iich ajt nmij'ap nmijteedy ci'm mooy Melquisedec je tüg picypï huidibi anajty ti pijci je rey ajcxy ma oy chiptuñ. ⁵ Nej Moisés ycötujcin y'ane'my je' anajty ajcxy yhuingapxy ma Dios ytijc je pinjaty Levi y'ung'ajtpy y'anäc'ajtpy, y'ap'ung'ajtpy y'apmang'ajtpy. Je' ajcxy cötujc miid co jäy ajcxy yajcuend'adipy tügpicy je majc-picypï huidibi xii diezmo. Oy je' anajty ajcxy ja'ajugy'adyii ja'amigüg'adyii, com hue' anajty ajcxy Abraham y'ap y'oc nidüg'óciy. ⁶ Per Melquisedec oy je' anajty ca' Levi ap'adyii teedy'adyii, yajcujt je Abraham tügpicy je majc-picypï. Je' je' anajty huidibi cidigiiyi tiibi anajty Dios yaj'ahuaniiy. Jadu'n Melquisedec yajpuhuaniiy Dios je Abraham. ⁷ Ni pin ycamina'nip co ca' yjanchity co je pin conuucxin yejcp, jac mij je', ca'ydi je pin yajconuucxp. ⁸ Ya ma iich ajt, pin cidigiiyip tügpicy je majcpicypï (diezmo), hue' je' ajcxy jäy huidibi öcp. Per jadu'n nej anajty Melquisedec, jadu'n ymina'ñ ma yjaybetyity co je' yjactzinaayñi. ⁹ E jëbi yajmina'ñ co je Levi etz jadu'nyibaad je y'ap y'oc huidibi ajcxy huingapxp ma Dios, e yajcujtcixy Israel jäy huidibi Dios patip, nañ jadu'n nipaady nej jihuïy ymigüety je' ajcxy je Melquisedec huin'it co Abraham ymigüejti. ¹⁰ Jadu'n nipaady nej jihuïy Abraham ñigix'ajtyñi y'ap'ajtin yteedy'ajtin Levi etz jacjadyii je

huidibi anajty ajcxy ca'ni ypi'c'atyñi yma'xung'atyñi co oy Melquisedec yjijpcobađiyii.

¹¹ Je Israel cajp yajc'idiđiyi je' je Dios y'ane'min ycötujcin je Levita ajcxy huidibi anajty huingapxp je mayjäy ma Dios, je' je' anajty ajcxy Aarón y'ap y'oc. Chi jada' co jada ajcxy janch ca'ocyaj'ahuimbijttäy tudägy pinjaty anajty je Dios ycötujcin payöyb, ca'p tim je' anajty ycopicyity co ycajacquëxyg jadüg huidibi codinähuip je mayjäy ma Dios, ca' y'ocje'jiñ ma ymiñ Aarón y'ap y'oc. Je jadügpi huidibi codinähuamyb je mayjäy ma Dios, hue' copicy co tú'ciy naybađiyb miid Melquisedec. ¹² Co ytigadzipy pinjaty huingapxp ma Dios, nañ jadu'n ytigadzip je tiy'ajt je cötujcin. ¹³ İch ajt nHuindzin Jesucristo, je huidibi ñimiydacpy ma Dios ñecy co huingapxa'ñ je mayjäy ma Dios, huingbi ap huingbi Teedy je' anajty, ca' y'ocLevíjn. E ni tüg yi' y'amigüg ca' yhuingapxy ma Dios. ¹⁴ Huädz yajnejhuüy co İch ajt je nHuindzin Jesús hue' je' anajty ymij'ap'ajty ymijteedy'ajty je Judá. Moisés ca' yi' capxpaty Judá y'ap y'oc co nimiydacy pinjaty anajty huingapxp je mayjäy ma Dios ytiyc.

¹⁵ Jacnigüëxıcp jada ooy co jadüg ytiđiyi huidibi tumb ma Dios, huidibi tú'ciy naybaatip miid Melquisedec. ¹⁶ Ca'p Jesucristo yajtungbijci co huingapxip je mayjäy ma Dios miid je cötujcin huidibi minaamb co yi' y'amigügtıyc pátip yi jadu'mbi tung, je huidibi ajcxy yjugy'ajtin cixip tigoyip. Hue' je Jesucristo chinaayın yjugy'ajtin ca' ycixipy ytigoyıpy ni mina, paady ycixp Jesucristo yajtungbijci huingapxip je mayjäy ma Dios. ¹⁷ Com miid je' ycixpi jadu'n Dios tiy'ajt yejcy co jadu'n ymina'ñ: Miich je' cham mhuingapxyp je mayjäy ma İch. Tüg nax miich mhuingapxin nej Melquisedec anajty yhuingapxy.

¹⁸ E jadu'n je oga'nbi je ane'min cötujcin huidibi Moisés yejc, ca' y'octuni cham, ca' jac ti mic'ajt miidity co jaydëbi yajtzögipy jäy ajcxy y'alma. ¹⁹ Je Dios ycötujcin huidibi Moisés jayhui'm jecy'ajty, ca'p je' ni ti yaj'oybidzimy yajhuätzpidzimy. Miid je huingapxpi ycixpi huidibi nmii'd'ajtim cham jac'oy yi' huidibi njjip'ijxim ma Dios.

²⁰ Co Dios Jesucristo yajtungbicy, chi nigapxpejty yci'm ayuc co yjanchity. ²¹ Jacjadyii ajcxy huidibi anajty tungixp ma Dios ytjic, hue' je' ajcxy tungmooyi, e ca' Dios nigapxpejty yi' ajcxy y'ayuc. Per co Jesucristo ytungbijcy, chi Dios nigapxpejty yci'm'ayuc. Com jaybety jadu'n ma Dios ñecy ma jadu'n ymina'ñ:

Je Huindzin Dios ti nigapxpety yci'm'ayuc, e ni mina ycajotmetzcñhuipy.

Jadu'n Dios nimay y'ung:

Miich mhuingapxamyb etz mgodinähuamyb je mayjäy ma iich huinixii huinitiempo. Jadu'n miich mdunipy nej Melquisedec ytuuñ.

²² Com Dios ñigapxpejty yci'm'ayuc co yjanchity co Jesucristo ytungbijcy, paady yi Jesús yi' je' majamoy mic'ajtmoy je jemybi ayuc huidibi yajhui'm miid jäy ajcxy ycixpi, je jac'oybi cötujcin. ²³ Jacjadyii huidibi anajty yhuingapxcixy ma Dios ytjic, nimay anajty ajcxy ooy. Com co tüg y'o'cy, chi huingbi ytigy ma je' ytung. ²⁴ Jesús com ca' yi' yjugy'ajtin ycixipy ytigoyipy ni mina, paady ca' ytung ixmach, etz ca' yi'ytungmöy ni pin. ²⁵ Miid je' ycixpi Jesucristo mic'ajt miidity jaydëbi yajnidzoocipy jäy ajcxy y'alma huinixii huinitiempo, pinjaty mibijctzooyb Dios ma Jesucristo yxii. Jesucristo jëbi tunipy jadu'n, com yi' yjugy'ajtin ca' ycixipy ytigoyipy ni mina. E yi' Dios mibijctzodii'b miid jäy ajcxy ycixpi jabom jabom huinixii huinitiempo.

²⁶ Je Jesús je' je' tügpajc je mįjtungmįdpi ma Dios, huıdibi ĩch ajt nyajmayajtim, je huıdibi mįd huadz yjot huadz yhuınma'ń, e ca' je' mįdity ni ti jıbıcpı ni ti pocy. Je' ca' tügnax y'ity mįd pocytumbıdjc. Nįgi je' ymįjity ycıxy, ca'ydı jac ti huıdibi yajpat tzajpjoty. ²⁷ Ca' Jesús yjadu'nity nej ajcxy jacjadyı huıdibi tuun ma Dios ytıjc jecy'ajty, co yaj'öccıxy iyujc, e je' ajcxy yejcpy huındzıgı'ń jabom jabom, mıdüg co je' ajcxy ńayyajpocyńıhuächyıı, e chi jada' mįd jäy ajcxy ypocy ycıxpı. Jesús tügtecpajc je' yej huındzıgı'ń mįd mayjäy ycıxpı, co je' cı'm ńayyejci ma yı o'cın jadu'n nej tüg huındzıgı'ń. ²⁸ Je Dios ycötujcın huıdibi Moısés yjayhui'm jecy'ajty, hue' y'ane'my co huen tungmöy jäy ajcxy huıdibi pocy mįd, co mįjtungmoy ma Dios ytıjc. Chi jac'axam Dios yajhui'my jemybı ayuc jemybı cötujcın, e nıgapxpejty yci'm'ayuc co yjanchıty. E mįd je jemybı ayuc Dios tungmoy yci'm'ung, huen yajnicıxp je mįjpi tung ma yı' y'ıt, je Dios y'ung huıdibi ijtp huınıxı ca' ti bocy mįdity.

8

Jesús yı' je' je mįjhuingapxpı ma yı Dios y'ayuc jemybı
¹ Huıdibi ooy nįgi ycopıcyıty, huıdibi yajnimıydaacp, co ĩch ajt nmįd'ajtim pin xycodınaayım ma Dios, je' je' je Cristo, je huıdibi jııby ijtp mįj'ane'mbı tzajpjoty, jadu'n nıpaady nej jıhuıy yı' y'ıńäy a'oy'amy ma Dios ymıjc. ² Jııby je' ytuń ma je janchypı Dios y'ıt ylugar, je amaaybı, huıdibi oyhuındzıgıy ijtp. Je it huıdibi Dios yajcoj, e ca' nminaanim jäy ajcxy yajcoj. ³ Tüg'öcyı pinjaty huıngapxp ma Dios, yajnıbıcy je' paady, e copıcyıty co cıyegıpy ofrenda etz tijaty huındzıgı'ń ma Dios mįd jäy ajcxy ypocy ycıxpı. Paady ooy ycopıcyıty nań jadu'n co Jesucristo yegıpy ofrenda etz huındzıgı'ń ma Dios mįd jäy ajcxy ypocy ycıxpı. ⁴ Co Jesucristo ıxyıpy ya

y'ocyajpaady naaxhuiñ, ni ycahuingapxy ixypy mayjáy ma Dios. Com jiini ya yajpaady pin huingapxip ma Dios ytijc, pin yejcp ofrenda etz huindzigi'ñ jadu'n nej Moisés ycötujcin y'ane'my. ⁵ Jadayaabi huingapxpi ajcxy ytungixy ma Dios ytijc ya naaxhuiñ. Je' je' tüg ijxpejt nej Dios y'it jiiby tzajpjoty, jadu'n yi' nipaady nej tüg anecpi huidibi tzomyb jiiby tzajpjoty. Co Moisés jecy'ajty Dios ytijc je' coji miid huit, chi Dios ñimaayi: “Cuenditun yajxon co anajty mgojy je tijc tügnax jadu'n nej je ijxpejt huidibi nyaj'ijx jim copcíxy.” ⁶ Per je mjtung huidibi Jesús ytumyb ma Dios miid jáy ajcxy ycixpi, jac'oydung yi' ca'ydi je tung huidibi je jáy ajcxy ytumyb huidibi mjtung miid ma Dios ytijc ya naaxhuiñ. Com jemybi etz jac'oy etz jacmic'ajt miid je cötujcin huidibi Dios ymoy Jesús, ca'ydi je cötujcin huidibi Dios ymoy Moisés jecy'ajt. Com hue' je' jac'oy alma nidzoocin Dios yaj'ahuaniy jáy ajcxy ma je jemybi cötujcin.

⁷ Co je jayijp'atypi cötujcin huidibi Moisés ymooyi cayaj'oyidaayi jáy ajcxy ypocy miid Dios, ca' yi' ixypy ycopicyity je mimetzpi cötujcin huidibi Dios ymoy jáy hujjemy. ⁸ Per Dios y'ijx co je jáy ajcxy ca' yajxon cuydungixy je cötujcin huidibi Moisés ymoy, jadu'n nej ymina'ñ ma yjaybetyity ma Dios ñecy miid je' ajcxy ycixpi, ma jadu'n ymina'ñ:

Jadu'n je Huindzin Dios ymina'ñ: “Mimb xii tiempo ma huingbi cötujcin nmöhuibich yi Israel jáy etz Judá jáy ajcxy.

⁹ Ca' y'ocjadu'niñ nej iich ngötujcin huidibi nmooyich je' ajcxy y'ap yteedy jecy'ajty, je huin'it tiempo taabi nyajtzooñich ajcxy jim Egipto naaxjot. Ca'p je' ajcxy cuyduñ je cötujcin huidibi ajcxy nmooyich, e paady ca' nduuñich cuendi yi' ajcxy.” Jadu'n ymina'ñ je Huindzin Dios.

¹⁰ Jadu'n je Huindzin Dios ymina'ñ:

Je cötujcin huidibi nyegaamybich ma Israel jäy ajcxy co anajty yijadu'mbi xii tiempo ti ñaxy, jadu'n je'. Nbidägibich ngötujcin ma yi' ajcxy yhuinma'ñ, e jadu'n nipaady nej jihuüy ti njayich n'ayuc ma ajcxy y'ay yjot. E ñich yi' ajcxy xyDios'adiib, e yi' ajcxy njäy'adiybich.

¹¹ Tüg'óciy ajcxy nejhuühuipy pin ñich. Ni pin ji cayaj'ixpigipy pin je' je Huindzin Dios, ni pin, ni ymügüg, ni ymijün ymidijc, ni pi'ctijc ni mij'anäctijc. Com nidüg'óciy ajcxy nejhuühuipy pin ñich; ypi'city ymutzity, ymijjäyity, etz ymij'anäcity.

¹² E ñich yi' ajcxy nmeecxip yjibicjäy'ajtin, ni camina ngajac'ajihuühuüybich ajcxy ypocy. Jadu'n Dios ymina'ñ.

¹³ Co Dios je' ycötujcin jemybi nimiydägy, je' je' co yaj'amijüyñi je jayijp'atpyi cötujcin. Je huidibi amijüyñip ca' je' y'octuunip, tzojc yi' yaj'ixtigoyaani.

9

Je Dios ytijc huidi ya naaxhuiñ etz Dios y'it huidi tzajpjoty

¹ Je Dios ycötujcin jayijp'atpyi ymiid je' anajty ñidiy'ajt nej huaad ytuñ ma Dios ytijc ya naaxhuiñ, ma jäy ajcxy huindzigihuipy Dios. ² Je Dios ytijc jadu'n je' ycojity. Je jayijpi cuarto hue' anajty xijity Lugar Santo, jiiby anajty y'ity je candelero etz je mesa ma tzajcaagy y'ity ma Dios yhuinduu. ³ Jüxc'i'py'amy ma je mimetzpi huit y'agiyducyity jiiby jadüg'it huidibi xijip Lugar Santísimo (ma Dios ni'ixcidägy je jäy). ⁴ Jiiby anajty tüg mij mesa ac tim ori je' anajty ma ajcxy ypoomjojccixy, e ma je' jim anajty y'ity tüg cajoon ac ori je' anajty yñinixc huidityi.

Jiiby cajoonjoty anajty y'ity tüg tu'tz ac ori huidibi anajty miid je jıxcy iıxpejt huidibi Dios Israel jäy ajcxy ymooy jecy'ajty. Etz jiiby anajty Aarón ytajc huidibi huijp huam. Etz jiiby anajty je tzaa y'ity ma je' anajty ycıjıjayıty Dios y'ane'mın. ⁵ Ma je cajoonnıcx jım anajty je querubines ñıgojtüdyıty huidibi Dios y'oy'ajtin miid. Je querubines anajty codınaayb Dios, e je' anajty ajcxy yajnıdigooyb miid yqueec je cajonnıcx ma ajcxy je huidzıgı'ñ ñı'py ypidacy miid jäy ajcxy ypocy ycıxpi. Ca' huaad yjajajnimıydacy mıjcajee jadachambi tijaty huidibi anajty yajpatp jiiby ma Dios ytıjc.

⁶ Jabom jabom co anajty jadu'n y'ıjttäy ni'ixı', chi je huıngapxpi ytıgııygıxy ma Dios ytıjc ma je jayıjpi cuarto, je Lugar Santo, tuñ ajcxy huındzıgı'ñ etz cuydungıxy yı' ajcxy ytıy'ajt miid Dios ycıxpi. ⁷ Jımıjt jımıjt ma je mımetzpi cuarto huidibi je huit adıydujcp, jiiby ytıgıy tügtecypajc je huıngapxpi huidibi jacmıjtungmiid ma Dios ytıjc. E co jiiby ytıgıy, chi mıdıgıy huaj ñı'py, huidibi miid huındzıgıy Dios miid yci'mbocy ycıxpi etz miid tüg'ócy jäy ajcxy ypocy ycıxpi etz miid ajcxy ypocy ycıxpi co ca' nejhuııygıxy co ytundıgooygıxy. ⁸ Miid jada ycıxpi je Espıritu Santo xyajnejhuııyım co je tungmiidpi huidibi huıngapxi je mayjäy ma Dios, ma ajcxy jacyajtungıxy anajty je jayıjp cuarto ma Dios ytıjc, chi ca'ni je' anajty y'ahuächñı nej jėbi pınjaty ytıgıy ma je it lugar Santıssımo ma Dios yhuınduu. ⁹ Je Dios ytıjc huidibi ıjtp anajty ya naaxhuıñ ca' je' yjėjıty je janchypi. Hue' je' anajty iıxpejt'ajtp huıdı Dios y'ıt'ajtpy tzajpjoty. Jiiby je tungmiidpi huındzıgıy Dios miid ofrendas etz miid huındzıgı'ñ. Per jada huındzıgı'ñ ca' yajtıgoy je pocytunıı ma je jäy ajcxy yjot yhuınma'ñ. ¹⁰ Je judıojäy ytıy'ajt huıdıbi tuun ma Dios ytıjc jecy'ajty, hue' je' ñıgapxy caayın uucin, etz

jadu'n nej ajcxy ñayyajpocyñihuáatzigixy miid nii etz canaag costumbre huidibi ajcxy cuydumyb. Jadu'n ajcxy ytuñ ixti cooni Dios yajtigajztay tüg'óciy yi' ycötujcin.

¹¹ Per ti y'oy ya naaxhuiñ je Cristo, e yi' je' cham ijtp jacmijtungmiidpi ma Dios, yi' ti mimiñ jemybi cötujcin jac'oybi. E yi' je' codinaayb je mayjäy ma Dios y'it tzajpjoty, je it jac'oybi jacmijpi, jacca'pxypi, ca' nminaanim jäy ti cojy, e ca' yaajity naaxhuiñ. ¹² Cristo ti ytigiy ma je Dios y'it, je lugar Santísimo. Ca' ti ytigiy miid co jilby yajquëxigañ pi'cchivo ñ'py o toro ñ'py, hue' yci'mni'py jilby yejcpy ma Dios. Jadu'n ti ytigiy tügtecy tigiy huinixii huinitiempo, etz xyyajnidzoocim ajt n'alma huinixii. ¹³ Ooy yjanchity co yi' toro ñ'py etz je chivo ñ'py etz yi' cuyjam co ajcxy nöccixy huaj niix ma je Dios ojadajttac, co ajcxy je pocyjäy yajnihuäxcixy je ni'py etz yajnixidujtcixy je cuyjam ymiid mic'ajt co yajpocyhuáatzigixy ñiniñcx, per jotjoty ca' yajhuäch. ¹⁴ (Je huingapxi huidibi tumb ma Dios ytijc ya naaxhuiñ ca' ymadägy co jäy yajpocyhuädziipy miid toro ñ'py), Jesucristo nigí ti ymadägy yajpocyhuäch jäy ajcxy miid yci'mni'py. Com Jesucristo ymiid je Dios yjihui'ñ ymic'ajt huidibi ca' ycixipy ytigoyipy ni mina, chi ñaygyejci ci'm ma Dios miid Dios yjihui'ñ ymic'ajt, jadu'n nej tüg huindzigi'ñ huätzpi, com ca' ni ma ni ti tundigoy. E miid yci'mni'py Jesucristo xyajhuaatzim je jibicpi ma ajt njot nhuinmañ, ca'ydi ndunim huidibi Dios ca' jäygidägy, e jadu'n ajt huaad ndunim ma je Dios juugypi ytung.

¹⁵ Paady yi' Jesucristo yi' je' huingapx'ajtp ma Dios miid ich ajt ycixpi miid je jemybi ycötujcin huidibi Dios yajhui'm. Yi' Jesucristo co y'o'cy, yi' ajt je' nbocy xymeecxim tiibi ndundigooyim ma je jayijp'atyp cötujcin huidibi Moisés jayhui'm. E jigix pinjaty Dios ti yhuin'ixyii,

jëbi ajcxy ycïdigÿii je tzinaydac ma jëbi n'ijtim huinixii. Je tzinaydac huidibi Dios ti xy'ahuaniyim. ¹⁶ Co tüg jây jïjp'ixy y'o'cin, e yajcojy tüg testamento, ooy ycopicyity co yajnejhuïhuipy pen janch je' ti y'ögy je pin yajcoj je tiy'ajt jigix je' ytigïhuipy tumbi je tiy'ajt. ¹⁷ Co tüg jây jïjp'ixy y'o'cin e yajcojy tüg testamento, ca' je' ti mic'ajt miidity je testamento pen jugy'ajtni pin je' anajty ti yajcojy. Huin'itni janchtiy co anajty ti y'ögy, huin'it je testamento mic'ajt miidity. Je jemybi tiy'ajt huidibi Dios xyajhui'my jadu'n yi' nipaady nej jây testamento yajcojy co anajty jïjp'ixy je y'o'cin, e co Jesús y'o'cy, huin'it mic'ajt moy je Dios ytiy'ajt je jemybi. ¹⁸ Paady ycixpi jecy'ajty co Dios Moisés moy cötujcin, yajtzoobaat je' miid iyujc ñi'py. ¹⁹ Moisés je' capxhuäcx je Dios ytiy'ajt ma tüg'óciy mayjäy. Chi jada' huijtzïgy tüg lana tzaptzpi miid tüg quipy aacx huidibi ooy oy yxuugy. Je' yajxooc ma huaj mang ñi'py etz chivo ñi'py teemhuidity miid ñi, chi Moisés yajnihui'ch je libro miid je ni'py, je libro huidibi anajty ti capxy etz nañ jadu'n jây ajcxy yajnihui'ch je ni'py. ²⁰ Co Moisés jadu'n ytuuñ, chi yminañ: “Jada je' je ni'py huidibi yajtzoobatp je ane'min je tiy'ajt huidibi Dios ti yecy ma miich ajcxy.” ²¹ Moisés nañ jadu'n ñi'pyñihui'ch je cochac tijc ma anajty yDios ojadajtcixy, e tüg'óciy tumbejt huidijaty jiiby tumb. ²² Dios ycötujcin, je jecyip, ymina'ñ co tüg'óciy huidijaty yajtungixyp co Dios ojadajtcixy, copicy yajhuädziy miid ni'py. E pen ca' ajcxy teemy yocy ni'py, Dios ca' huinmecxa'ñ yi' ajcxy ypocy.

Co Cristo y'o'cy miid ajt nbocy ycixpi, yi' yajnicxy ajt nbocy

²³ Ooy jada anajty ycopicyity iyujc ñi'py huindzigi'ñ, jigix yhuädziy huidijaty tumb ma Dios ytijc ya naaxhuiñ, je huidibi ijxpejt'ajtp anajty nej Dios y'it jiiby tzajpjoty.

Per je Dios y'it huidibi jiiby tzajpjoty chojcpy jac'oybi huindzigi'n ca'ydi huidi ya naaxhuiñ. ²⁴ Com Cristo ca' je' ytigiy ma Dios ytijc huidibi jäy ajcxy ti cojy. Je tijc huidibi jäy ajcxy ti cojy, je' je' ñigojtuutin je it lugar janch janchypi huidi jiiby tzajpjoty. Cristo tigiyy ma je Dios y'it ylugar jiiby tzajpjoty, ma je' cham xycodinaayim ma Dios yhuinduu. ²⁵ Je judío mjtungmiidpi huidibi huingapxp ma Dios ytijc, huinjimjtity ytigiy ma je Dios ytijc co yecy ni'py huidibi ca' ci'mni'py'adyii. Cristo ca' yi' ñay'ahuaniyiii y'ögipy canaag'oc, jäyi tügtecypajc ytigiiy ma Dios y'it miid yci'mni'py. ²⁶ Co ixipy ca' yjadu'nity, canaag'oc Cristo ixipy patni chaachy'öcin maabi naaxhuiñybi chondagy. Per jadachambi ma xii tiempo ycixaani ytigoyaani, Cristo tügtecypajc ñayguëxici ya naaxhuiñ, jigix codinahuipy tüg'öciy jäy ma Dios miid ajcxy ypocy ycixpi. Jadu'n Cristo tuuñ jigix yajtigoyipy pocytunii. ²⁷ Dios ane'min pidac ya naaxhuiñ co nidüg nidüg jäy paadip yi o'cin tügtecypajc. E Dios ti pidägy je xii je tiempo mina tiyduna'n nidüg nidüg jäy miid ypocy ycixpi. ²⁸ Je Cristo jotcuyc tügtecypajc nayyejci ma je o'cin co yajpocyñihuaatztäy je mayjäy. Chi jada' ñayguëxiga'nyii je mimejtz'ocpi ya naaxhuiñ, e ca' nminaanim co yajpocyñihuaatzaanip jadüg'oc je mayjäy, hue' je' nihua'namyb ycohua'namyb tüg'öciy pinjaty jijp'ijxip cixyjot huinjot co je' miina'n miid yi' ajcxy ycixpi.

10

¹ Je Dios ycötujcin huidibi Moisés jayhui'my jecy'ajty, hue' je' anajty ñidiy'ajt je oybi huidibi miinamb. Ca'p je' anajty yjéjity je oybi. Paady je cötujcin huidibi Moisés yjayhui'm ca' je' jébi huädz yaj'ahuimbity pinjaty pocy ytumb, pinjaty mijhuäcp anajty ma Dios

míid je iyujc huídibi ajcxy Dios yajhuindzigíiyb, huídibi ytun'ahuimbijtcixyp Jiménez Jiménez. ² Co ixypy je cötujcín y'ocmadägy huídibi Moisés yjayhui'm yaj'ahuimbity ixypy huádz ajcxy je pocy ytumbi, ca' ixypy je jadu'mbi huindzigi'ñ y'ocyajtuuni Jiménez Jiménez. Com pin je jadu'mbi huindzigi'ñ yejcp, co ixypy je' ypocy yajnicxtäy, ca'p je' ma ñayjihuhuiyb ti bocy míidity jadüg'oc. ³ Co jadu'n yaj'öccixy je iyujc míid ypocy ycixpi, je' je' je tiy'ajt co ajihuygóotigixy ypocy Jiménez Jiménez. ⁴ Com yi huaj mang ñi'py etz yi chivo ñi'py ca' mic'ajt míidity co pocyajnicxtähuiipy nimina.

⁵ Paady co Cristo ymiiñ ya naaxhuiñ, chi nimay je Dios: Ca' miich ni ti huindzigi'ñ mdzojcní ma ymiiñ iyujc'ögy, ti miich xyñ'ixíyich tüg ninícx.

⁶ Ca' m'ocjäygidaacni huindzigi'ñ iyujc huídibi yajno'cp. Ca' miich m'ocjäygidaacni co jäy xyajhuindzigi'y iyujc míid ypocy ycixpi.

⁷ Chi nmina'ñich: “Dios, cha nmiiñich jigix miich mdzojcní yajcuydunípy, jadu'n nej yjaybetyity ma miich mnecy míid íich ycixpi.”

⁸ Tim jayjip, Cristo ymina'ñ co Dios ca' octzojcní, ni cajäygidägy je iyujc ögy huídibi yajhuindzigiíyip, ni je huídibi yajno'cp, jigix je pocyñicxtähuiipy, oy yi' yajjity huídibi ñigapxy yajtunípy ma je Dios ycötujcín huídibi Moisés yjayhui'm. ⁹ Chi jada' jadüg'it yjaybetyity co Cristo jadu'n ymina'ñ: “Cha íich nmiiñ, jigix miich mdzojcní yajcuydunípy, miich huídibi Dios'ajtp.” Hue' mīnānim, yajtigoy je cötujcín huídidi ane'mb co jäy ajcxy huindzigiíy iyujc míid ypocy ycixpi, etz mic'ajt mo' je jemybi cötujcín huídibi Jesucristo xymooyim. ¹⁰ Dios jadu'n ti xyajhuaatzim ajt nbocy, com Jesucristo ti tuuni Dios chojcní co ci'm ñinícx tügtecypajc yejcy ma yi o'cin míid tüg'ócíy jäy ypocy ycixpi.

¹¹ Tüg'óciy judío sacerdote huidibi tungmiid ma Dios ytjic jabom jabom jadu'n tun'ahuimbijtcixy tügpi huindzigi'ñ, huidibi ni camina yajnicxtaayi jäy ajcxy ypocy. ¹² Yi Jesucristo tügtecypajc yi' yejcy ñini'cx ma yi o'cin huinixii huinitiempo, chi jada' y'ixtacy a'oy'amy ma Dios ymijc ma ane'mdäy tüg'óciy. ¹³ Jiiby tzajpjoty Jesucristo cham y'ahuixy, ixti cooni Dios yi' ymidzip mimadactaayip, e jadu'n ajcxy nipaadipy nej jihuiy Jesucristo ytecypocxpejt. ¹⁴ Miid tügpajc je huindzigi'ñ huidibi Jesucristo yejc, tudägy yaj'ahuimbijttäy huinixii huinitiempo pinjaty ti ypocyhuäch. ¹⁵ Yi Espíritu Santo nidiy'ajtp ma iich ajt jadu'n nej Cristo ti tuñ. Com jaybety miiñ ma Dios ñecy ma Dios jadu'n ymina'ñ:

¹⁶ Je huin'it xii je huin'it tiempo nyajmihui'maamybich je Israel jäy jemybi ayuc jemybi tiy'ajt. Nbidägibich ngötujcin ma ajcxy yjot, e njayamybich ngötujcin ma ajcxy yhuinma'ñ.

¹⁷ Chi jac'axam Dios ymina'ñ:

Ni camina njäymedzaanich ajcxy ypocy, etz jadu'n nej ajcxy ytundigooy.

¹⁸ Co je pocy ti yajhuinmecxtäy, ca'p ycopicyity yjacyaj-tunipy tijaty huindzigi'ñ miid pocyhuinmeecxin ycixpi.

Chojcpy nmihuingoonim yi Dios

¹⁹ Paady miich ajcxy migügtijc, jëbi iich ajt ndigiiyim agujc jotcujc ma Dios yajpaady miid co Jesucristo ti temy ti yocy ñi'py miid iich ajt nbocy ycixpi. ²⁰ Cristo ti yaj'ahuäch je nii'aa je tü'aa miid iich ajt ycixpi miid yci'm nin'cx, je nii'aa tü'aa jemybi oybi huidibi tigiiyb ma Dios y'it. E je' yñini'cx jadu'n nipaady nej je huit huidibi anajty adujcp je Lugar Santísimo ma Dios ytjic ya naaxhuiñ, je huit huidibi ciichhuäch co Cristo y'o'cy. ²¹ Jesucristo yi' je' je migtungmiidpi huidibi xycodinaayim ma Dios ytjic jiiby

tzajpjoty. ²² Paady ycixpi jëbi nmihuingoonim Dios miid oyjot oyhuinma'ñ, etz miid je mibijcin janchypi. Cristo ajt ti xyajhuaatzim njot nhuinma'ñ co ñi'py temy vojcy miid ajt nbocy ycixpi jigix ca'ydi nayjihuiyim pocymiid, jadu'n nej jihuiy ti ndziihuim miid huadz nii. ²³ Tzoc tudägy n'ijtim ma nmibijcin, ca' nyajtigajtzim nmibijcin, com Dios cuydunipy yi' tiibi xyaj'ahuaniyim. ²⁴ Tzoc nhuinma'ñypidaacim co njot'amijmooyim ajt nmigügtijc, jaydëbi naychojcin nayjihuiyim miñ xyipy, e nduunim oyjäy'ajtin. ²⁵ Ca' n'ixmajtzim je nayoymugii, jadu'n nej ajcxy nijëjity costumbre miidity co ca' ajcxy yöy ma naymujctac. Nigi tzoc nayjot'amijmooyim, e jadu'n nej cham yaj'ijxni co yhuingooni ma je Huindzin Jesucristo ymiinaani jadüg'oc ya naaxhuiñ, chona'ñ tzajpjoty.

²⁶ Pen iich ajt jacpocytunim tzojcingixy ma anajty ti nejhuiyim Dios ytiy'ajt, ca'p ji huingbi huindzigi'ñ huidibi xyajpocyhuaatzim. ²⁷ Je' janchtiy njacjijp'ijxim miid tzig'i'ñ jihui'ñ je tzaachypi co anajty Dios xytiydunim, e xypidaacim mijjinjoty huidibi yajhuindigoydähuamb Dios ymidzip. ²⁸ Co pin cacuyduun Dios ycötujcin huidibi Moisés yjayhui'm, e jim metz o tugüig testigo co yjadu'nity, yajmoy je' y'o'cin ca' miid'ajty ti pa'ayoohuin. ²⁹ ¿Nej miich ajcxy minaangixy? ¿Nej cay jac'öctiy je tzaachypi mihuaad'ajtcixy? Je pinjaty ca' ixa'ñ Dios y'ung etz nixiici yajxiici Cristo ñi'py huidibi yajpocynihuaatzp, jadu'n nej je jemybi ayuc ymina'ñ huidibi Dios yajhui'm. Etz nañ jadu'n ajcxy ni'ojiiygixy Dios yEspíritu huidibi may'ajt oy'ajt tumb miid je' ajcxy. ³⁰ Nejhuiyim co je Huindzin Dios ymina'ñ: “iich xypatp ndzaachytunipyich jäy ajcxy miid ypocy ycixpi. iich yi' nyajcomidohuiipy ajcxy ypocy.” Etz nañ jadu'n yjaybetyity ma Dios ñecy: “Yi Huindzin Dios yi' yjäy tiydunipy.” ³¹ ¡Ooy chach mij

y'ayo'nity pen je Dios juugypi xychaachytunim miid ajt nbocy ycixpi!

³² Per ajihuüiyigixy miich ajcxy je xii je tiempo tiibi ñaxy, je taabi miich anajty ajcxy ti xycđigüiyigixy je tiy'ajt janchypi, ñipaty je' anajty nej tüg tiicxin jain ajcxy miidity. Ti ooy mhuindinaaygixy mjijptinaaygixy tzaachypi ayo'n miid yi mmibijcin ycixpi. ³³ Nijëjity miich ajcxy ti myajhuingapxnajxcixy, e ti myaj'ojcixy mayjä-duum. Nañ jadu'n jacjadyi ti abaatcixy tzaachypi jadu'n nej je tiibi ajcxy ooy yajtzaachytungixy. ³⁴ Ti miich ajcxy myajtungixy pa'ayo'n ma pinjaty anajty pujxtigotyip, e janch agujc jotcujc ajcxy ti myajtungixy mecxtujcin co ajcxy xypijci tijaty anajty ajcxy miid. Nejhuüiyim co jii by tzajpjoty miich ajcxy miidity ti jaty jac'oybi huidibi huinixii huinitiempo ijtp. ³⁵ Jacmijpidaaccixy Dios, ca' mjotmetzcüygixy. Co mmijpidaaccixipy Dios, huin'it ajcxy mbaadipy oybi may'amy ma Dios. ³⁶ Chojcypy co miich ajcxy myajtungixipy mecxtujcin co mguydunaangixy nej Dios tzocy, e Dios xyajcđigüiyigixip huidibi yi' ti ahuanüy. ³⁷ Jaybety jadu'n ma Dios ñecy ma jadu'n yminañ:

Tzojc, janch tzojc ymiina'ñ je huidibi tzonamb tzajpjoty, e ca'p je' jecyñity.

³⁸ Jadu'n Dios ymina'ñ:

Pinjaty iich ti ngöbicy co ytudägyjäyity, tzinähuip je' miid ymibijcin. E pen ixtigihua'cp ma ymibijcin, ca' jadu'n njotcujc'adipyich miid je'.

³⁹ Ca'p iich ajt njëjity huidibi ixtigihua'cp ma nmibijcin, e ytigoy y'alma, je' iich ajt pin mibijcp, e jadu'n n'alma paadipy nidzoocin.

11

Yi mibijcin

¹Jotcujc nayjihuiyim jadu'n co huidibi nmibijcin janch yi', oy co ca' n'ijxim. Je huidibi nmibijcin je' xy-mooyim jotcujc'ajtin miid huidibi njijp'ijxim ma Dios. Je huidibi nmibijcin nejhuiyim co janch janch jadu'n, oy ca' n'ijxim. ²Com miid co ajt nmij'ap nmijteedy ajcxy mibijci Dios y'ayuc paady Dios cöbijcy ajcxy jadu'n nej tudägyjäy.

³Miid ajt nmibijcin ycixpi nejhuiyim co Dios oyduñ tüg'óciy huidibi jii'ajtp miid y'ayucti'ajty, jigix huidibi cham n'ijxim je' yi' yaj'oyiyy huidibi ca' yaj'ixy.

⁴Miid co Abel mibijcy Dios, paady Abel ymoy Dios huindzigi'ñ jac'oybi ca'ydi Caín, e Dios cöbijci Abel yhuindzigi'ñ, e miid je' ycixpi Abel ooy ycömaybidzimy ma Dios co anajty ytudägyity. E jadu'n oy Abel ti yja'o'cini, jadu'n nipaady nej jihuiy yjacmiydägyñi chambaad. Com miid je mibijcin huidibi anajty ymiid yejc ijxpejt ma ich ajt.

⁵Miid co Enoc mibijcy Dios paady yajnicxi jadügpi tzinaydac ni yca'o'cy, ni ca' ajcxy paty, com Dios anajty ti yajnicxyii. Jadu'n ymina'ñ ma yjaybetyity ma Dios ñecy, ca'ni anajty yajnicxyii: “Dios jäygidacpy anajty Enoc chinaayin.” ⁶Pen ca' nmiid'ajtim mibijcin ni jadu'ñyi, ca' Dios jäygidägy ajt ndzinaayin. Com co nmihuingonaanim Dios, hue' tzocy co nmibijcin co Dios yjiiijty, e co yaj'ahuimbidity oybi miid pin mibijcip.

⁷Miid co Noé mibijcy Dios, paady Dios ñimaayi jayijp co ytuna'nyii yjada'nyii mijniigom huidibi anajty ca'ni yaj'ixy. Co Dios ymígapxi, chi Noé yjotmaybaady e yaj'oyiy je barco ma yi' etz y'ung y'anäg ñiigomdzögipy. Miid co anajty Noé miidity mibijcin, paady yajpocycäy je naaxhuiñjyäj ajcxy ca'pi ymibicy. Chi Dios cöbijcy Noé jadu'n nej tudägyjäy miid co mibijci Dios y'ayuc.

⁸ Miid co Abraham anajty Dios mibicy, paady Dios yhuin'ijxi e ycapxymidouhui. Chi je' choon ma ñaax ycajpin ñicxy ma je it lugar huidibi Dios anajty möhuaanip co je'adiiyb. Choñ, ni ca' anajty nejhuüy ma ñicxy. ⁹ Miid co Abraham mibijcy Dios, paady chinaydacpijcy nej tög huingjyä ma je naax huidibi Dios yaj'ahuaniiyi, huidibi ca' yjējity. Chinay ma huittjic, nañ jadu'n ajcxy y'idiich Isaac etz Jacob huidibi ajcxy nañ jadu'n Dios yaj'ahuaniiyi je naax. ¹⁰ Abraham je' anajty y'ahuijxyp mina jēbi chinaydacpicy ma Dios y'it ylugar huidibi jadu'n nipatp nej tög cajp huidibi miid y'ijx ta'tzpcicy y'oyduñity, je huidibi Dios ñihuinmayiy, je huidibi Dios yajcojy yaj'oyiiyb.

¹¹ Sara hue' anajty pumäy, ti anajty ymijäyiyiñi, ti ñajxni tiempo mina jēbi y'ung'ixy. Per miid co mibijcy Dios y'ayuc huidibi ti ñimaayi co y'ung'ixa'ñ anajty, chi paty mijaa co y'ungdzimigip. E chi y'ung'ijxy com ymibijc co Dios anajty cuyduna'ñ tiibi ahuaniiy. ¹² Miid tögpi jäy, je Abraham, ti choondacy tögpcicy y'amigügtjic huidibi oy ti ymayiy. Abraham, oy anajty je' ti yjahuingoni mina y'ögaani, chi ooy y'ung y'anäg, y'ap'ung y'apmang janchmay paty, jadu'n ymayity nej madza' etz ymayity nej pu' ma mejypa', janch ni ycamicho'nity.

¹³ Tög'óciy je jäy ajcxy huidibi ya yajnimiydacp, öctay ajcxy ni ycacidigiiyi je tzinaydac huidibi anajty Dios ti yaj'ahuaniiyi. Miid co ajcxy mibijcy Dios, paady nejhuüy ajcxy co jacjiini Dios ymöhuüyb je huidibi ti yaj'ahuaniiyi. Com ymibijc ajcxy Dios, paady jotcuyc ñayjihuiiyi co Dios möhua'ñyii jacjiini huidibi ti yaj'ahuaniiyi. Yminañ ajcxy co anajty y'adzinaaygixy ya naaxhuiñ. ¹⁴ Pinjaty jadu'n minamb co adzinaaybi ajcxy yajpaady, hue' ya-jhuimbizimy co chinaydac yjugy'ajttac ajcxy y'ixtaayb.

¹⁵ Co ixypy ajcxy jäymejtzó'cigixy je naax ma anajty ti choongixy, janch ycahuimbijty ajcxy jim jadüg'oc. ¹⁶ Per je' ajcxy nigí anajty nijot'ajtcixy it lugar jac'oybi, je' je' je' tzajpjoty. Miid jada ycixpi Dios ca' yi' cho'yduñ co ñaydiyii Dios ma je' ajcxy. Com ti ni'ixiyyi ajcxy chinaydac jiiby tzajpjoty.

¹⁷ Abraham mibijcy Dios, e co Dios Abraham y'ijxmajtzi, chi yajmiiñ Isaac co anajty yajhuindzigihua'ñ Dios. E janch cixyot je y'ung tügpajc anajty yecy, je y'ung huidibi Dios ti yaj'ahuaniiy anajty. ¹⁸ Dios ñimay Abraham co miid Isaac miid'ada'ñ may y'ap y'oc. ¹⁹ Abraham yhuinmaayb anajty ooy co Dios tügpajc cötujcmiidip yajjugypigipy öcipy. Paady jëbi ich ajt nminanim co Abraham ycidigiiy jadüg'oc y'ung co anajty ti yjugypicy co anajty ti y'ögy.

²⁰ Isaac mibijcy Dios, paady Isaac Dios mibijctzoy miid Jacob etz Esau ycixpi co huen ajcxy oybi paadip ma je tiempo huidibi mim cidacni. ²¹ Jacob ymibijcy anajty Dios, paady co anajty y'ögaani, chi ahuaniiy conuucxin ma nidüg nidüg José y'ung y'anäg. E jadu'n Dios ooy huindzigiiy ojadayty yam ñaygodajc'adyii miid ytajc co anajty ooy ti ymijjäyiyñi. ²² José co anajty Dios mibicy ma anajty y'ögaani, yminañ co Israel jäy ajcxy anajty ypidzimaangixy comjey jim Egipto, chi yajhui'my tiy'ajt nej ypajc ytuniiyb co anajty choñ ajcxy jim Egipto.

²³ Miid co anajty ajcxy mibicy Dios, paady co Moisés yma'xung'ajty, chi ytaj yteedy yützi tugiig po'. Com co ajcxy ijxy co anajty ooy y'oyity je ma'xung, ca' ajcxy anajty tzigiy je rey y'ane'min co anajty yaj'öctähua'ñ tüg'óciy ungma'xung yëydijcpi. ²⁴ Miid co Moisés mibijcy Dios, paady co oy ymij'anäccojni, ca' tzojcy co ñaydijiiyb co rey ñiix y'ung'adiib. ²⁵ Hue' janchtiy Moisés nigí nijot'ajty co ayo'n tzaachypi minaxipy yajnaxipy quipxy

míid Dios yjáy, ca'ydi co nixondägípy je jugy'ajtin ma je rey ytjic huidibi Dios ca' jáygidágy. ²⁶ Moisés nígi ñajjihuíyi jotcuyc co tzaachypi ayo'n anajty minaxy yajnaxy míid Cristo ycixpi, ca'ydi co míid'ajttáhuipy jugy'ajt comeeñ'ajt jim Egipto. Com Moisés ti anajty yhuinma'ñypidágy co Dios yega'ñ je oybi. ²⁷ Míid co Moisés mibicy anajty Dios paady choñ jim Egipto, ni catzigíy co anajty rey yjotmädy, jadu'n y'ijty tudágy nej jihuíy ixty je Dios ca'pi yaj'ixy.

²⁸ Míid co mibijcy Dios paady Moisés tuuñ je pascuaxii, chi ni'ane'mdiíy co huen tijc'aguu tüg tüg yajni'pyíy, jigix co je ángel huidibi yaj'öcp, ca'p je' je israelitajáy y'ungoob yaj'o'cipy. ²⁹ Míid co ajcxy mibijcy Dios paady je israelitas ajcxy yajnaxy je tzaptz mejy jadu'n nej jihuíy ñajxcixy huindítzuuy, e co ajcxy je Egipto jáy nañ jadu'n yjanaxañ, cijx ajcxy ñii'o'ctáy.

³⁰ Míid co ajcxy mibijcy Dios, paady ycidáday je poch ma je Jericógajp, taab anajty je israelitas ajcxy ti júhuidijtcixy huixtujc xii. ³¹ Míid co Rahab, je töxyjáy jibic tzinaaybi, mibijcy Dios, paady ca' y'o'cy quipxyi míid je huidibi anajty ca' capxymidoogixy Dios. Com co je' yajjättacy ma ytjicín je huidibi anajty ti choongixy ma Israel jáy ajcxy anajty yajpaady, co anajty ayüch ameech yajcüyögixy yajtecyyöygixy Canaán naaxjot.

³² ¿Ti njacmiydägibich? Nyajtigoy'idaamybich tiempo co nimiydägibich Gedeón, Barac, Sansón, Jefté, David, Samuel, e jacjadyii Dios y'ayucnajtzcaxiiybi. ³³⁻³⁴ Míid co ajcxy mibijcy Dios, paady ymímadac ajcxy ymidzip canaag picy, ane'my ajcxy yajxon yi cajpjáy, ypaat ajcxy pubejtin huidibi Dios anajty ti yaj'ahuaníyigixy. Yaj'adujc ajcxy caa y'ahuac, yajxeem ajcxy jiiñ huídi anajty ooy ymijity, tzooc ajcxy co anajty yaj'ögaangixy míid espada.

Pinjaty anajty pumäyip ypaat je' ajcxy ymic'ajt ymijaa, mij je' ajcxy ooy y'ijtcixni ma chiptungixy, e ymimadactay ajcxy maymidzip. ³⁵ Jim anajty töxyjäy yjätigixy huidibi ajcxy cidihiyi y'ung juugy huidibi anajty ti jugypicy co anajty ti y'ögy. Jadyii ajcxy y'o'cy ahuoni' agidzi', ca'p ajcxy paty nidzoocin. Jadu'n ajcxy paty o'cin, jaydëbi patcixy jugy'ajtin etz tzinaayim jac'oybi ma Dios. ³⁶ Jadyii Dios y'ayucnajtzcaxiibi ooy ñixiici yajxiici, yajci'ajty, etz tzumy mach ypujxtijc'iñäy. ³⁷ Jadyii Dios y'ayucnajtzcaxiibi y'o'cy ajcxy tzaagögäch, jadyii yaj'ajidiy ajcxy janch tim cup y'ijxmajtzi ajcxy, jadyii yaj'o'ci miid espada. Ymiñ xyijpy xii yaa yhuidijectcixy ymiid ajcxy ñin'icx yüch miid cöbixy'ac etz miid chivo'ac, ayoob jäy ajcxy, jotmay miid, yajtzaachtungixy yajca'oydungixy. ³⁸ Yi jadu'mbi Dios y'ayucnajtzcaxiibi ajcxy ni je naaxhuiñyjäy anajty camihuaadity. Miid ymidzip pahuidijcixy, paady yhuidijectcixy anajty titznaaxtuum etz yuugioty, chinaaygixy naaxpa'tci'py etz majaty ang. ³⁹ Nidüg'óciy je' ajcxy oy cömay ajcxy yjanajxy miid co mibijcy ajcxy Dios, ca' ajcxy paty tiibi anajty Dios y'ahuanïy. ⁴⁰ Com Dios jac'oybi je' anajty yegamyb miid iich ajt, paady ca' ajcxy paty je oybi tiibi Dios y'ahuanïy. Ti anajty Dios nihuinmayïy co yajca'pxaani yi' ajcxy ytudägy'ajtin quipxyi miid iich ajt co Cristo y'o'cy miid iich ajt nbocy ycixpi.

12

Tzoc iich ajt nhuinma'ñybidaacim ma Jesús

¹ Com nmiid'ajtim canaag ijxpejt nej jäy jecy'ajty mibijcy Dios, paady iich ajt jadu'n nipaady nej jihuïy huinduy jajixci'py nmiid'ajtim jäy huidibi ti yajniguëxïgy ymibijcin. Paady ycixp tzoc ahuing pidaacim je huidijaty

xy'adzjipim ma ajt nmibjcin, e nañ jadu'n tzoc ahuing pidaacim je pocy huidibi xyajhuinma'nydigooyim, e tzoc naymic'ixim cuydunim yi' tiy'ajt miid mecxtujcin ma ajt ndzinaayin, jadu'n nej jäy ñaymic'íjxigixy co nay-boyčquípxigixy. ² Tzoc nhuinma'nybidaacim ma Jesús. Jim i'xpejt nbaatim ma Jesús nej jëbi nmibjcin Dios. Jesús yi' je' ti xyajnejhuiyim Dios ytiy'ajt. Yi Jesús yi' y'ayoo anajty ma je cruudz, ni ca' yi' tuñcuendi je jadu'mbi o'cin oymidzo'yduunip. Com co Jesús ñejhuiyb anajty co jadu'n y'oc'ayoohuipy, chi ypaadipy jotcuyc'ajtin ma Dios y'ane'my. E cham je' yajpaady ma Dios ymijc ma Dios y'ane'mdac.

³ Huinmaaygixy miich ajcxy je Jesús y'ixpejt, nej pocyjäydjic chaachytuungixy etz ñi'ojjyigixy, etz ca' y'ixaani, paady ca' mdzjpcigixy ni mgamijotmetzciiygixy. ⁴ Ca'ni miich ajcxy ayo'n tzaachypi myajnaxy mabaad ni'py ajcxy mxiiibidyii jadu'n nej Cristo yjajty. ⁵ ¿Nej ti miich ajcxy mjäydigooygixy je capxhuijin huidibi Dios ti xymooygixy nej jihuiy yci'm'ung? Jadu'n ymina'ñ ma Dios ñecy:

Miich n'ungich, ca' mbidägy nej jihuiy ca' ytim ytiijity je tzaachypi huidibi Dios miid xycapxhuijy, ni ca' mjotmetzcihuipy co xyaj'ójipy.

⁶ Dios ycapxhuijpy yi' pinjaty chojcpy yjihuiyb. Dios chaachtumby yi' ajcxy co ytundigooy, pinjaty yi' ti cöbicy nej jihuiy yci'm'ung.

⁷ Mimadaaccix miich ajcxy je castigo, com Dios jadu'n yi' xymiidity ajcxy nej jihuiy yci'm'ung. ¿Nej ji jada' tüg ung, e ca' yteedy chaachtuniyb co ytundigooy? ⁸ Pen ca' miich ajcxy Dios ti tzaachypi xymooygixy, jadu'n nej yi' moy castigo tüg'óciy y'ungdjic y'anäctjic, ca' miich ixypy ajcxy Dios xy'ung'adyii tiydudägy. Jadu'n miich ajcxy

m'idipy nej tüg pi'c'anäg huidibi yteedy ca' y'ixa'ñyii.
⁹ Jadüg nax, taabi anajty ajt nbi'cnity, ñch ajt ndeedy ya
 naaxhuiñ xy'ihuijim xycapxhuijim anajty, e xychaachy-
 tuunim co ca' ngapxymidoohuim nhuindzigiiyim ajcxy.
 ¿Nej co ca' huaad n'ijtim ane'my ma ajt ndeedy huidibi
 tzajpjoty yajpatp? E jadu'n jëbi nbaatim je jugy'ajtin
 huidibi ca' ycixipy ytigoyipy nimina. ¹⁰ ñch ajt ndeedy
 ya naaxhuiñ xy'ihuijim xycapxhuijim anajty miid jada
 conbi jugy'ajt ycixpi, jadu'n nej je' anajty ajcxy oy'ixy.
 Nañ jadu'n Dios ñch ajt xychaachytuunim miid ajt n'oy'ajt
 ycixpi etz jigix nmiiid'ajtim huädz jot huädz huinma'ñ
 nej Dios ymiidity huädz yjot huädz yhuinma'ñ. ¹¹ Oy
 yjanchity co ca' ti tzaachypi ndzojcm ma yam nbaatim
 je tzaachypi, com ooy ndzachjihuiyim je tzaachypi, e ca'
 jotcuyc nayjihuiyim. Per pinjaty ixpijcpí Dios chojcin
 miid je tzaachypi ycixpi, chi je' yhuimbizimiiygixy tüg
 jugy'ajtin tädägyipi etz jotcuycpi.

Je huidibi ayo'ngojp co Dios y'ayuc ngacöbigaanim

¹² Paady miich ajcxy jotmicpijccix ma mmibijcin, jadu'n
 nipaadip nej jihuiy myajpidiccixy mgi' tiibi y'anucxiinyñi,
 etz mgoxcohuajc mic'ajt paady huidibi anajty ca' mic'ajt
 miidity. ¹³ Ixtaaygix nii'aa tü'aa tiybi ma mdzinaayin,
 jadu'n nipaadip nej jihuiy yi mdecy huidibi mädiip ti
 chögy, e camina jadüg'oc yhuiidip.

¹⁴ Tzinaaygix miid oyjot oyhuinma'ñ miid nidüg'óciy
 jäy. Ca' mdungixipy ti tzip. Miid'ajtcix tüg tzinaayin
 huätzpi, pen ca' jadu'n mdungixy, ni pin ca'ixipy je
 Huindzin Jesucristo. ¹⁵ Ooy cuenditungixp co ni pin
 cajjipyöydüdiipy je pubejtin huidibi Dios ti ahuanñy, jigix
 nañ jadu'n ni pin ycayajpaadiipy janch mät yjot yhuin-
 mañ, e yajhuindigoydäy yajmättäy jacjadyii ymigügtjic,
 tim jadu'n nej tüg ujtz ta'mbi ypa'mduñ. ¹⁶ Ni tüg

miich ajcxy ca' huaad ti ayuc miid'aty miid huingbi töxyjäy huidibi ca' miich mdöxyijc'adyii. Ca' nañ jadu'n m'ixtijipy je ayuc huidibi Dios yajhui'my miid miich ajcxy ycixpi, jadu'n nej y'idüich Esaú. Miid tüg caayin uucin Esaú toocnax je huidibi anajty möhuaanip yteedy co y'unggoobity. ¹⁷ Miich ajcxy mnejhuiyb co Esaú tocy huidi anajty paatip co japada'nñ je conuucxin huidibi anajty yteedy möhuaanip, ca' jadu'n Dios cöbijcy, chi Esaú ooy yjayaaxni, per ca' anajty ñihuinma'nñ nej yjothuimbidip miid je' ycixpi tiibi anajty tuñ.

¹⁸ Ca' miich ajcxy ti mjaty ti m'ixy, nej jecy'ajty yi israelitas ajcxy yjaty etz y'ixy co ajcxy mihuingoñ je cop Sinaí ma anajty Dios ti pidägy mij jin, ma anajty ooy yhuidezucy yjidity etz mijpoj mijtigoy ñaxy, ma anajty ooy y'agoodziy anaxy. ¹⁹ Ni mgamidoy ajcxy je trompeta ni je Dios y'ayuc huidibi anajty ajcxy je' migapxip. Pinjaty je' midou je ayuc ypijctzou ajcxy may'ajt co ca' huaad yjacmigápxigixy com ooy anajty chigiigixy. ²⁰ Je' je' anajty ycixpi co anajty ca' mimadägaangixy je ane'min cötujcin huidibi anajty minamb: “Pin anajty ytecy pidacp ma yi cop, hue' yi' y'ooyaj'o'cnity cögäch miid tzaa o miid quipyjipxu'n, oy ixypy y'iyujcity.” ²¹ Oy chigiinyñi huidibi anajty yaj'ijxp, Moisés ci'm minaan: “Tziyuuybich yam miid tziği'nñ.”

²² Per miich ajcxy jadu'n nipaady nej jihuüy ti mmihuingoongixy yi cop huidibi yxií Sión etz je Dios juugypí ycajp. Je' je' je' Jerusalén tzajpjoty pi ma canaag mil je ángeles ajcxy yöymujccixy. ²³ Ti miich ajcxy mmihuingoongixy ma ti yöymujccixy je jaccömaaybi jäy huidibi ajcxy yxií cojaay ma Dios ñecy jiiby tzajpjoty, je huidibi ajcxy huin'ñib huingapxtacp Dios. Ti miich ajcxy mihuingoongixy Dios je huidibi nijuez'ajtp tüg'óciy. Nañ jadu'n ti miich ajcxy mihuingoongixy je' ajcxy je oyjäydijc

y'espíritu huidibi Dios ti yaj'ahuimbijttäy tudägy. ²⁴ Miich ajcxy ti mihungoñ yi Jesús, yi huidibi xycodinaayim ma Dios miid je jemybi cötujcin huidibi Dios yajhui'my miid iich ajt ycixpi. Yi Jesús huidibi mic'ajtmoy je Dios y'ayuc jemybi, co ñi'py teemy yojcy miid ajt nbocy ycixpi. Yi Jesús co ci'm ñi'py teemy yojcy miid jäy ajcxy ypocy ycixpi, niigi oy yi' ca'ydi co Abel iyujc ñi'py teemy yojcy miid ypocy ycixpi.

²⁵ Paady ycixp ooy cuenditungix miich ajcxy, ca'ydi yaj'ixtijy Dios, je pin ti xyajmihui'mim jemybi y'ayuc. Je jäy ajcxy huidibi tzinay jecy'ajty, ca'p je' ajcxy chocy co ajcxy ixtijy Dios co jecy'ajty yjamigapxi ajcxy ya naax-huiñ. O'ctiy iich ajt ca' ndzoocim, pen nmooyim ajt njiix je Dios, je pin y'ayuc xyajmihui'mim huidi tzoon tzajpjoty.

²⁶ Co Dios y'ayuc yejcy jecy'ajty, chi yajtzuyuuy ooy naax. Jadachambi Dios ymina'ñ: “Jadügtecpajc nya-jtziyuya'ñich je naax, e ca' nminaanim naaxti'ajty, nañ jadu'n nyajtziyuya'ñich je tzajp.” ²⁷ Co jadu'n Dios ymina'ñ: “Jadügtecpajc nya-jtziyuya'ñich je naax.” Hue' yajhuinjihuüy co ytigoydähuipy huidijaty yücxp huidibi Dios yaj'oyiüy, e je' hui'mip je huidijaty ca' yu'cxy. ²⁸ Paady je Jesucristo ycötujcin huidibi Dios xyajmihui'mim, ca' yi' huaad ytigoy. Tzoc yajnaxim Dioscojuyip miid Jesús y'ayuc ycixpi, e nyajmij'ajtim n'ojadajtim Dios miid tudägy'ajt etz miid huindzigi'ñ nej je' jäygidägyin. ²⁹ Iich ajt nDios jadu'n yi' nej tüg jin huidibi nöctaayb tüg'óciy.

13

Nejjëbi nyajjäygidaaacim Dios

¹ Miich ajcxy huidibi miibijcp Jesucristo, ca' mjäydigooygixy co ajcxy mnaychójcigixipy miñ xyipy nej jihuüy ajcxy mdügquëxyity. ² Ca' ajcxy mjäydidigóoygixipy

co oyjäy'ajtın mdúngxıpy mıid pınjaty ajcxy xycojädiıyb. Mıid co oyjäy'ajtın ajcxy tuuñ, chi nijëjıty ajcxy yajjättacy ángeles ajcxy, ni ca' ajcxy huinjıhuıy co ángeles anajty tı yajjättaaccıxy.

³ Mjäymedzip ajcxy pınjaty tzumy'iñaayb mach'iñaayb jadu'n nej jıhuıy mıich ajcxy nañ jadu'n mdzumy'iñaaygıxy mmach'iñaaygıxy quıpxy mıid je' ajcxy. Jäymeedzip mıich ajcxy pınjaty tzaachypı ayo'n mıınajxp yajnajxp, com nañ jadu'n mıich ajcxy mııdıty je ninıcx huıdıbı jëbı y'ayoy.

⁴ Huen nidüg'óciy jäy huındzigıygıxy yajmıj'ajtcıxy je pıjcin casada'ajtın. Huen je yëdıjc etz je ytöxyıjc naymııdtzınáayıgıxy yajxon, com Dios yı' tzaachytunıpy pınjaty tundıgooyb mıid huingbı töxyjäy.

⁵ Ca' m'adzojccıxy meeñ. Mıjotcujc'ajtcıxy tı ajcxy ii mıid. Dios tı je' ymına'ñ: “Camına xıı iıch mıich ajcxy n'ixmadzıpy, ni iıch mıich ajcxy ngajäyđıgoıpy.” ⁶Jadu'n jëbı nmınaanıı agujc jotcujc: “Yı Huındzın Dios yı' xy-pubejtpıch, ca' ndzigıhua'ñıch jäy nej xyjatuna'ñıch.”

⁷ Jäymejtzcıx mıich ajcxy je pınjaty tı xyñıgohuajc'ajtcıxy, je pınjaty tı xyajmııdmiydaaccıxy Dios y'ayuc ytıy'ajt. Huınmaaygıx nej je' ajcxy anajty ytudägy'aty, padungıx nej je' anajty ajcxy mııdıty ymıbıjcin.

⁸Jadu'n nej Jesucristo oybı tuñ jecy'ajty, nañ tım jadu'n oybı tuñ chambaad, etz oybı tuna'ñ huınıxıı huınıtıempo, ca' yı' yajtıgadzip yı yhuınma'ñ ni mına. ⁹Ca' mııch ajcxy myajhuın'ıngıxy mıid canaag ıxpıjcin huıdıbı ca' ytügnaxıty mıid Jesucristo ytıy'ajt. Nıgı oy co ajt nbıdaacım nhuınma'ñ ma je Dios y'ayuc, nej yı' xy-chojcm xyjıhuııyım, nej yı' may'ajt tuñ mıid iıch ajt. Ca' mbıdaacım mhuınma'ñ ma je cötujcin huıdıbı adujcp

nijëjity caayin uucin. Ni ti jotcujc'ajt ajcxy capaty pinjaty panicxp yi jadu'mbi cötujc'in.

¹⁰ Je judío tungmiidpi huídibi huindzigi'ñ tumb anajty ma Dios yhuittijc je jecyip, ca' yi' jëbi yjactuuni ma ñich ajt nmibijc'in jadu'n nej Jesucristo tuñ huindzigi'ñ miid ñich ajt ycixpi. ¹¹ Je judío mïjtungmiidpi ma Dios ytijc ypidac iyujc ñi'py ma je Lugar Santísimo nej tüg huindzigi'ñ huídibi yajpocyñihuaatzp je mayjäy. Je iyujc ögy ñinïcx jiguem je' yajnögy, ca' jiibyity cajpjoty ma je Dios anajty huindzigi'ñygyxy. ¹² Tim jadu'n nej je judío sacerdote yajnögy je huindzigi'ñ iyujc ñinïcx cajp ninaxy, nañ tim jadu'n Jesús paty tzaachy'o'c'in cajp ninaxy jigix miid je' yci'mni'py pocyñihuaádzp je mayjäy. ¹³ Tzoc mïjpidaacim je Jesús tiibi y'ögy cajp ninaxy miid ñich ajt nbocy ycixpi. Tzoc minajxim yajnaxim je canayyajmij'adii je canay'ixa'niñ, tim jadu'n nej Jesús minajx yajnax je canayyajmij'adii je canay'ixa'niñ. ¹⁴ Ya naaxhuiñ ca' ya ajt nmïdity tüg ciudad ma jëbi n'ijtim huinixii huinitiempo, je' ñich ajt njijp'ijxim je tzinaayin huídibi miimb cidaacp. ¹⁵ Paady ycixp chojcpy co Dios n'ojadajtim nmibijctzoohuim jabom jabom huinixii miid Jesucristo yxi. Co jadu'n n'ojadajtim nmibijctzoohuim Dios jadu'n nipaady nej tüg huindzigi'ñ nmooyim. Tzoc ii mibijctzoohuim, tzoc ojadajtim miid ajt ngi'm'ahuac ngi'm'ayuc. ¹⁶ Ca' mjäydigóoygixipy co oybi mdúngixipy etz naybubéjtigix naybudigíyigix miñ xyipy. Co jadu'n mdúngixipy jadu'n nipaady nej tüg huindzigi'ñ ti myejccixy ma Dios huídibi yi' ooy jäygidägy.

¹⁷ Capxymidoogix pinjaty xyñigohuajc'ajtcixp etz yajmij'ajtcixp, com yi' miich ajcxy xycuend'ajtip yi m'alma. Nejhuuiyim co cïyegaangixy ycuendi ma Dios nej ajcxy ti xycuend'aty. Pen oybi miich ajcxy mdumyb

míid yí' ajcxy, jotcujc ajcxy ñayjihuihuiyb. Pen jibic miich ajcxy mduñ míid yí' ajcxy, tajip mayip ajcxy. E pen yí' ajcxy tajp maayb, chi miich ajcxy ca' ni ti jotcujc'ajt mmiid'adipy.

¹⁸ Mibijctzoogix Dios míid íich ycixpi etz je pinjaty xymiidhuidijtpich. Jatytim naymic'íjxibich tudägy nduuñich ma tüg'óciy íich ndung, paady ycixp jotcujc nayjihuiyijich. ¹⁹ May'ajt nbijctzooybich ma miich ajcxy co Dios mmibijctzoogix míid íich ycixpi, jigix Dios a'ixíhuipy co nícxibich tzojc ma miich ajcxy.

Oy'ajt etz capxpoocxin huidibi cogixiyñip je necy

²⁰ Dios nmibijctzooybich míid miich ajcxy ycixpi. Je Dios huidibi yajjugypijc jadüg'oc íich ajt nHuindzin Jesucristo co y'o'cy, je huidibi cuend'ajtp je maymibijcpidijc. Co Jesucristo ñí'py teemy yojcy, chi mic'ajt moy je jemybi cötujcin huidibi Dios ti xyajmihui'mim. Dios ti pidägy Jesucristo jadu'n nej je cuend'ajtpi jac'oybi ma je maymibijcpidijc. Jadu'n yí' nipaady nej tüg cöbixy cuend'ajtpi huidibi cuend'ajtp may ngöbixy. ²¹ Je Dios huidibi xyajjotcujc'ajtim je' huen xyaj'ahuimbijtcixy huädz etz oyjäy ma tüg'óciy ajcxy mmibijcin etz ma tüg'óciy ajcxy mdzinaayin, jigix ajcxy mdunipy nej yí' tzocy. Dios huen tuñ ma íich ajt njot nhuinma'ñ míid Cristo ymic'ajt nej yí' tzocy. ¡Huen Cristo y'idipy mij cömay huinixii huinitiempo! Amén. Jadu'n jada.

²² Nmígügtijc, nbijctzooybich may'ajt yajtungixy mecxtujcin ma jada ayuc capxhuijin. Ti ajcxy ii con nijayiygixy. ²³ Nejhuiygix miich ajcxy co ajt nmígüg Timoteo y'ity ahuätztuum. Pen tzojc yjädy ya ma nya-paadyich, chi yí' xymiidnícxibich co íich anajty miich ajcxy nicxy n'ijxcixy.

²⁴ Nguejxpyich ngapxpoocxin ma nidüg'óciy pin ajcxy xyñigohuajc'ajtp etz je migügtijc ajcxy huidibi mibijccixyp. Je migügtijc huidibi ajcxy yajpatp ya Italia yquejxyp ajcxy capxpoocxin ma miich ajcxy.

²⁵ Dios ajcxy xyconuucxip nidüg'óciy miich ajcxy. Amén. Jadu'n jada.

El Nuevo Testamento en mixe de Coatlán

New Testament in Mixe, Coatlán (MX:mco:Mixe, Coatlán)

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

Copyright Information

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Coatlán

© 1976, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

